



唐

書

二



特
1735
216



1735  
216

本紀第三

唐書三

唐書三

高宗天皇大聖大弘孝皇帝諱治字為善太宗第九子也母曰文德皇后長孫氏始封晉王貞觀七年遙領并州都督十七年太子承乾廢而魏王泰次當立亦以罪黜乃立子治為皇太子太宗嘗命皇太子遊觀習射太子辭以非所好願得奉至尊居膝下太宗大喜乃營寢殿側為別院使太子居之太宗每視朝皇太子嘗侍觀決庶政二十三年太宗有疾詔皇太子聽政於金液門四月從幸翠微宮太宗崩以羽檄發六府甲士四十衛皇太子入於京師六月甲戌即皇帝位於樞前大赦賜文武官勳一轉民八十以上粟帛給復雍州及比歲供軍所一年癸未長孫無忌為太尉癸巳檢校洛州刺史李勣為開府儀同三司參掌機密八月癸酉河東地震乙亥又震庚辰遣使存問河東給復二年賜壓死者人絹三

新念圖書  
此係明治  
八年八月  
廿八日  
所購山田  
以贈資  
朝書圖



正庚寅葬文皇帝於昭陵九月甲寅荆王元景爲司徒吳王恪爲司空乙卯李勣爲尚書左僕射同中書門下三品十一月乙丑晉州地震左翊衛郎將高侃伐突厥是冬無雪

永徽元年正月辛丑改元丙午立妃王氏爲皇后張行成爲侍中二月辛卯封子季爲許王上金杞王素節雍王四月己巳晉州地震五月己未太白晝見六月高侃及突厥戰于金山敗之庚辰晉州地震詔五品以上言事七月辛酉以旱慮囚八月戊辰給五品以上解官充侍者半祿加賜帛庚午降死罪以下九月癸卯高侃俘突厥車鼻可汗以獻十月戊辰李勣罷左僕射十一月己未貶褚遂良爲同州刺史十二月庚午琰州獠寇邊梓州都督謝萬歲死之

二年正月戊戌開義倉以賑民乙巳黃門侍郎宇文節中書侍郎

柳奭同中書門下三品乙卯瑤池都督阿史那賀魯叛四月乙丑命有司毋進肉食訖于五月七月丁未賀魯寇庭州左武衛大將軍梁建方右驍衛大將軍契苾何力爲弓月道行軍總管以伐之八月己巳高季輔爲侍中于志寧爲尚書左僕射張行成爲右僕射同中書門下三品己卯白水蠻寇邊左領軍將軍趙季祖爲郎州道行軍總管以伐之九月癸卯以同州苦泉牧地賜貧民十月辛卯晉州地震十一月辛酉有事于南郊癸酉禁進犬馬鷹鶻戊寅忻州地震甲申雨木冰是月竇州義州蠻寇邊桂州都督劉伯英敗之趙季祖及白水蠻戰于羅仵候山敗之十二月乙未太白晝見壬子處月朱邪孤注殺招慰使單道惠叛附于賀魯是冬無雪

三年正月癸亥梁建方及處月戰於牢山敗之甲子以旱避正殿

減膳降囚罪徒以下原之己巳褚遂良爲吏部尚書同中書門下三品丙子享於太廟丁亥耕藉田三月辛巳雨土宇文節爲侍中柳奭守中書令四月庚寅趙季祖及白水蠻戰敗之甲午彭王元則薨是月兵部侍郎韓瑗爲黃門侍郎同中書門下三品五月庚申求齊侍中崔季舒給事黃門侍郎裴澤隋儀同三司豆盧毓御史中丞游楚客子孫官之七月丁巳立陳王忠爲皇太子大赦賜五品以上子爲父後者勳一轉民酺三日九月丙辰求周司沐大夫裴融尚書左丞封季琰子孫官之是月中書侍郎來濟同中書門下三品十二月癸巳濮王泰薨

四年二月甲申駙馬都尉房遺愛薛萬徹柴令武高陽巴陵公主謀反伏誅殺荆王元景吳王恪乙酉流宇文節於桂州戊子廢蜀王愔爲庶人己亥徐王元禮爲司徒李勣爲司空四月壬寅以旱

慮囚遣使決天下獄減同中太僕馬粟詔文武官言事甲辰避正殿減膳六月己丑太白晝見八月己亥隕石於馮翊十有八九月壬戌張行成薨甲戌褚遂良爲尚書右僕射十月庚子幸溫湯甲辰赦新豐乙巳至自溫湯戊申睦州女子陳碩真反婺州刺史崔義玄討之十一月庚戌陳碩真伏誅癸丑兵部尚書崔敦禮爲侍中丁巳柳奭爲中書令十二月庚子高季輔薨

五年正月丙寅以早詔文武官朝集使言事三月戊午如萬年宮乙丑次鳳泉湯辛未赦岐州及所過徒罪以下六月癸亥柳奭罷丙寅河北大水遣使慮囚八月己未詔免麟游岐陽今歲課役岐州及供頓縣半歲九月丁酉至自萬年宮十月癸卯築京師羅郭起觀於九門

六年正月壬申拜昭陵赦醴泉及行從免縣今歲租調陵所宿衛

進爵一級令丞加一階癸酉以少牢祭陪葬者甲戌至自昭陵庚寅封子弘爲代王賢潞王二月乙巳皇太子加元服降死罪以下賜酺三日五品以上爲父後者勳一轉乙丑營州都督程名振左衛中郎將蘇定方伐高麗五月壬午及高麗戰于貴端水敗之癸未左屯衛大將軍程知節爲蔥山道行軍大總管以伐賀魯壬辰韓瑗爲侍中來濟爲中書令七月乙酉崔敦禮爲中書令是月中書舍人李義府爲中書侍郎參知政事九月庚午貶褚遂良爲潭州都督乙酉洛水溢十月齊州黃河溢巳酉廢皇后爲庶人乙卯立宸妃武氏爲皇后丁巳大赦賜民八十以上粟帛十一月巳巳皇后見于太廟戊子停諸州貢珠癸巳詔禁吏酷法及爲隱名書者是冬皇后殺王庶人

顯慶元年正月辛未廢皇太子爲梁王立代王弘爲皇太子壬申

大赦改元賜五品以上子爲父後者勳一轉民酺三日八十以上粟帛丙戌禁胡人爲幻戲者甲午放宮人三月辛巳皇后親蠶丙戌戶部侍郎杜正倫爲黃門侍郎同中書門下三品四月壬寅詔五品以上老疾不以罪者同致仕壬子矩州人謝無零反伏誅七月癸未崔敦禮爲太子少師同中書門下三品八月丙申崔敦禮薨辛丑程知節及賀魯部歌邏祿處月戰於榆幕谷敗之九月庚辰括州海溢癸未程知節及賀魯戰于怛篤城敗之十一月乙丑以子顯生賜京官朝集使勳一轉自八月霜且雨至于是月是歲龜茲大將羯獵顛附于賀魯左屯衛大將軍楊胄伐之二年閏正月壬寅如洛陽宮庚戌右屯衛將軍蘇定方爲伊麗道行軍總管以伐賀魯二月癸亥降洛州囚罪徒以下原之免民一歲租調賜百歲以上羶衾粟帛庚午封子顯爲周王壬申徙封素

節爲郇王三月戊申禁舅姑拜公主父母拜王妃癸丑李義府兼中書令五月丙申幸明德宮七月丁亥如洛陽宮八月丁卯貶韓瑗爲振州刺史來濟爲台州刺史辛未衛尉卿許敬宗爲侍中九月庚寅杜正倫兼中書令十一月戊戌如許州甲辰遣使慮所過州縣囚乙巳獵於溲南壬子講武於新鄭赦鄭州免一歲租賦賜八十以上粟帛其嘗事高祖任佐使者以名聞十二月乙卯如洛陽宮丁巳蘇定方敗賀魯於金牙山執之丁卯以洛陽宮爲東都三年正月戊申楊胄及龜茲羯獵顛戰於泥師城敗之二月甲戌至自東都戊寅慮囚六月壬子程名振及高麗戰于赤烽鎮敗之十一月乙酉貶杜正倫爲橫州刺史李義府普州刺史戊子許敬宗權檢校中書令甲午蘇定方荐賀魯以獻戊戌許敬宗爲中書令大理卿辛茂將兼侍中

四年三月壬午崑陵都護阿史那彌射及西突厥真珠葉護戰於雙河敗之四月丙辰于志寧爲太子太師同中書門下三品乙丑黃門侍郎許圜師同中書門下三品戊辰流長孫無忌於黔州于志寧罷五月己卯許圜師爲中書侍郎同中書門下三品丙申兵部尚書任雅相度支尚書盧承慶參知政事戊戌殺涼州都督長史趙持滿七月己丑以早避正殿壬辰慮囚八月壬子李義府爲吏部尚書同中書門下三品十月丙午皇太子加元服大赦賜五品以上子孫爲父祖後者勳一轉民酺三日閏月戊寅如東都皇太子監國辛巳詔所過供頓免今歲租賦之半賜民八十以上羶衾粟帛十一月丙午許圜師爲左散騎常侍檢校侍中戊午辛茂將薨癸亥賀魯部悉結闕俟斤都曼寇邊左驍衛大將軍蘇定方爲安撫大使以伐之盧承慶同中書門下三品

五年正月癸卯蘇定方俘都曼以獻甲子如并州巳巳次長平賜父老布帛二月丙戌赦并州及所過州縣義旗初嘗任五品以上葬并州者祭之加佐命功臣食別封者子孫二階大將軍府僚佐存者一階民年八十以上版授刺史縣令賜酺三日甲午祠舊宅三月丙午皇后宴親族隣里於朝堂會命婦於內殿賜從官五品以上并州長史司馬勳一轉婦人八十以上版授郡君賜瓊衾粟帛巳酉講武於城西辛亥左武衛大將軍蘇定方爲神兵道行軍大總管新羅王金春秋爲岨夷道行軍總管率三將軍及新羅兵以伐百濟四月癸巳如東都五月辛丑作八關宮戊辰定襄都督阿史德樞賓爲沙磧道行軍總管以伐契丹六月庚午朔日有食之七月乙巳廢梁王忠爲庶人丁卯盧承慶罷八月庚辰蘇定方及百濟戰敗之壬午左武衛大將軍鄭仁泰及悉結拔也固僕骨

同羅戰敗之癸未赦神兵道大總管以下軍士及其家賜民酺三日十一月戊戌蘇定方俘百濟王以獻甲寅如許州十二月辛未獵於安樂川巳卯如東都壬午左驍衛大將軍契苾何力爲沮江道行軍大總管蘇定方爲遼東道行軍大總管左驍衛將軍劉伯英爲平壤道行軍大總管以伐高麗阿史德樞賓及奚契丹戰敗之

龍朔元年正月戊午鴻臚卿蕭嗣業爲扶餘道行軍總管以伐高麗二月乙未改元赦洛州四月庚辰任雅相爲沮江道行軍總管契苾何力爲遼東道行軍總管蘇定方爲平壤道行軍總管蕭嗣業爲扶餘道行軍總管右驍衛將軍程名振爲鏤方道行軍總管左驍衛將軍龐季泰爲沃沮道行軍總管率三十五軍以伐高麗甲午晦日有食之六月辛巳太白經天八月甲戌蘇定方及高麗

戰於涇江敗之九月癸卯及皇后幸李勣許圍師第壬子徙封賢  
為沛王十月丁卯獵於陸渾戊辰獵於非山癸酉如東都鄭仁泰  
為鐵勒道行軍大總管蕭嗣業為仙粵道行軍大總管左驍衛大  
將軍阿史那忠為長岑道行軍大總管以伐鐵勒

二年二月甲子大易官名甲戌任雅相薨戊寅龐季泰及高麗戰  
於蛇水死之三月庚寅鄭仁泰及鐵勒戰於天水敗之乙巳如河  
北縣辛亥如蒲州癸丑如同州四月庚申至自同州辛巳作蓬萊  
宮六月癸亥禁宗戚獻纂組雕鏤七月戊子以子旭輪生滿月大  
赦賜酺三日右威衛將軍孫仁師為熊津道行軍總管以伐百濟  
戊戌李義府罷八月壬寅許敬宗為太子少師同東西臺三品九  
月丁丑李義府起復十月丁酉幸溫湯皇太子監國丁未至自溫  
湯庚戌西臺侍郎上官儀同東西臺三品十一月辛未貶許圍師

為虔州刺史癸酉封子旭輪為殷王是歲右衛將軍蘇海政為颶  
海道行軍總管以伐龜茲海政殺崑陵都督阿史那彌射

三年正月乙丑李義府為右相二月減百官一月俸賦雍同等十  
五州民錢以作蓬萊宮巳亥殺駙馬都尉韋正矩庚戌慮囚四月  
戊子流李義府于嶺州五月壬午柳州蠻叛冀州都督長史劉伯  
英以嶺南兵伐之六月吐蕃攻吐谷渾涼州都督鄭仁泰為青海  
道行軍大總管以救之八月癸卯有彗星出於左攝提戊申詔百  
僚言事遣按察大使於十道九月戊午孫仁師及百濟戰于白江  
敗之十月辛巳詔皇太子五日一至光順門監諸司奏事小事決  
之十二月甲戌雨水冰十二月庚子改明年為麟德元年降京師  
雍州諸縣死罪以下壬寅安西都護高賢為行軍總管以伐弓月  
麟德元年二月戊子如福昌宮癸卯如萬年宮四月壬午道王元



慶薨五月戊申許王季薨丙寅以旱避正殿七月丁未詔以三年正月有事於泰山八月己卯幸舊第降萬年縣死罪以下壬午至自萬年宮丁亥司列太常伯劉祥道兼右相大司憲竇德玄爲司元太常伯檢校左相十二月丙戌殺上官儀戊子殺庶人忠劉祥道罷太子右中護樂彥瑋西臺侍郎孫處約同知軍國政事是冬無雪

二年二月壬午如東都三月甲寅司戎太常伯姜恪同東西臺三品戊午遣使慮京都諸司及雍洛二州囚閏月癸酉日有食之是春疎勒弓月吐蕃攻于闐西州都督崔智辯左武衛將軍曹繼叔救之四月丙午赦桂廣黔三都督府丙寅講武于却山之陽戊辰左侍極陸敦信檢校右相孫處約樂彥瑋罷七月己丑鄧王元裕薨十月壬戌帶方州刺史劉仁軌爲大司憲兼知政事丁卯如泰

山大有年

乾封元年正月戊辰封於泰山庚午禪於社首以皇后爲亞獻壬申大赦改元賜文武官階勳爵民年八十以上版授下州刺史司馬縣令婦人郡縣君七十以上至八十賜古爵一級民酺七日女子百戶牛酒免所過今年租賦給復齊州一年半兗州二年辛卯幸曲阜祠孔子贈太師二月己未如亳州祠老子追號太上玄元皇帝縣人宗姓給復一年四月甲辰至自亳州庚戌陸敦信罷六月壬寅高麗泉男生請內附右驍衛大將軍契苾何力爲遼東安撫大使率兵援之左金吾衛將軍龐同善營州都督高偁爲遼東道行軍總管左武衛將軍薛仁貴左監門衛將軍李謹行爲後援七月乙丑徙封旭輪爲豫王庚午劉仁軌兼右相八月辛丑竇德玄薨丁未殺始州刺史武惟良淄州刺史武懷運九月龐同善及

高麗戰敗之十二月己酉李勣爲遼東道行臺大總管率六總管兵以伐高麗

二年正月丁丑以旱避正殿減膳慮囚二月丁酉涪陵郡王愔薨辛丑禁工商乘馬六月乙卯西臺侍郎楊武戴至德東臺侍郎李安期司烈少常伯趙仁本同東西臺三品東臺舍人張文瓘參知政事七月己卯以旱避正殿減膳遣使慮囚八月己丑朔日有食之辛亥李安期罷九月庚申以餌藥皇太子監國辛未李勣及高麗戰于新城敗之是歲嶺南洞獠陷瓊州

總章元年正月壬子劉仁軌爲遼東道副大總管兼安撫大使沮江道行軍總管二月丁巳皇太子釋奠于國學戊寅如九成宮壬午李勣敗高麗克扶餘南蘇木底蒼巖城三月庚寅大赦改元四月乙卯贈顏回太子少師曾參太子少保丙辰有彗星出于五車

避正殿減膳撤樂詔內外官言事庚申以太原元從西府功臣爲二等第一功後官無五品者授其子若孫一人有至四品五品者加二階有三品以上加爵三等第二功後官無五品者授其子若孫從六品一人有至五品者加一階六品者二階三品以上爵一等辛巳楊武薨八月癸酉至自九成宮九月癸巳李勣敗高麗王高藏執之十二月丁巳俘高藏以獻丁卯有事于南郊甲戌姜恪檢校左相司平太常伯閻立本守右相

二年二月辛酉右肅機李敬玄爲西臺侍郎張文瓘爲東臺侍郎同東西臺三品三月丙戌東臺侍郎郝處俊同東西臺三品癸巳皇后親蠶四月己酉如九成宮六月戊申朔日有食之七月癸巳左衛大將軍契苾何力爲烏海道行軍大總管以援吐谷渾九月庚寅括州海溢壬寅如歧州乙巳赦歧州賜高年粟帛十月丁巳

至自岐州十一月丁亥徙封旭輪爲冀王改名輪十二月戊申李勣薨是冬無雪

咸亨元年正月丁丑劉仁軌罷二月戊申慮囚丁巳東南有聲若雷三月甲戌大赦改元壬辰許敬宗罷四月癸卯吐蕃陷龜茲撥換城廢安西四鎮己酉李敬玄罷辛亥右威衛大將軍薛仁貴爲邏娑道行軍大總管以伐吐蕃庚午如九成宮雍州大雨雹高麗酋長鉗牟岑叛寇邊左監門衛大將軍高偁爲東州道行軍總管右領軍衛大將軍李謹行爲燕山道行軍總管以伐之六月壬寅朔日有食之七月甲戌以雍華蒲同四州旱遣使慮囚減中御諸廩馬戊子李敬玄起復薛仁貴及吐蕃戰于大非川敗績八月庚戌以穀貴禁酒丁巳至自九成宮甲子趙王福薨丙寅以旱避正殿減膳九月丁丑給復雍華同岐邠隴六州一年閏月癸卯皇后以

早請避位甲寅姜恪爲涼州道行軍大總管以伐吐蕃十月庚辰詔文武官言事乙未趙仁本罷十二月庚寅復官名是歲大饑二年正月乙巳如東都皇太子監國二月辛未遣使存問諸州四月戊子大風雨雹六月癸巳以旱慮囚九月地震丙申徐王元禮薨十月丙子求明禮樂之士十一月甲午朔日有食之庚戌如許州遣使存問所過疾老鰥寡慮囚十二月癸酉獵于昆陽丙戌如東都是歲姜恪爲侍中閣立本爲中書令

三年正月辛丑姚州蠻寇邊太子右衛副率梁積壽爲姚州道行軍總管以伐之二月己卯姜恪薨四月壬申校旗于洛水之陰九月癸卯徙封賢爲雍王十月己未皇太子監國十一月戊子朔日有食之甲辰至自東都十二月金紫光祿大夫致仕劉仁軌爲太子左庶子同中書門下三品

四年正月丙辰鄭王元懿薨四月丙子如九成宮閏五月丁卯禁  
作簏捕魚營圍取獸者八月辛丑以不豫詔皇太子聽諸司啓事  
巳酉大風落太廟鴟尾十月壬午閣立本薨乙未以皇太子納妃  
赦歧州賜酺三日乙巳至自九成宮

上元元年二月壬午劉仁軌爲雞林道行軍大總管以伐新羅三  
月辛亥朔日有食之巳巳皇后親蠶八月壬辰皇帝稱天皇皇后  
稱天后追尊六代祖宣簡公爲宣皇帝妣張氏曰宣莊皇后五代  
祖懿王爲光皇帝妣賈氏曰光懿皇后增高祖太宗及后諡大赦  
改元賜酺三日十一月丙午如東都巳酉獵于華山曲武原十二  
月癸未蔣王暉自殺

二年正月巳未給復雍同華歧隴五州一年辛未吐蕃請和二月  
劉仁軌及新羅戰于七重城敗之三月丁巳天后親蠶四月辛巳

天后殺周王顯妃趙氏丙戌以旱避正殿減膳撤樂詔百官言事  
巳亥天后殺皇太子五月戊申追號皇太子爲孝敬皇帝六月戊  
寅立雍王賢爲皇太子大赦七月辛亥祀王上金免官削封邑八  
月庚寅葬孝敬皇帝于恭陵丁酉詔婦人爲宮官者歲一見其親  
庚子張文瓘爲侍中郝處俊爲中書令劉仁軌爲尚書左僕射戴  
至德爲右僕射十月庚辰雍州雨雹壬午有彗星出于角亢

儀鳳元年正月壬戌徙封輪爲相王丁卯納州獠寇邊二月丁亥  
如汝州溫湯遣使慮免汝州輕繫三月癸卯黃門侍郎來恒中書  
侍郎薛元超同中書門下三品甲辰如東都免汝州今歲半租賜  
民八十以上帛閏月巳巳吐蕃寇鄯廓河芳四州左監門衛中郎  
將令狐智通伐之乙酉周王顯爲洮河道行軍元帥領左衛大將  
軍劉審禮等十二總管相王輪爲涼州道行軍元帥領契苾何力

等軍以伐吐蕃四月戊申至自東都甲寅中書侍郎李義琰同中書門下三品戊午如九成宮六月癸亥黃門侍郎高智周同中書門下三品七月丁亥有彗星出于東井乙未吐蕃寇豐州八月庚子避正殿減膳撤樂損食粟馬慮囚詔文武官言事甲子停南北中尚梨園作坊減少府雜匠是月青州海溢十月乙未至自九成宮丙午降封郇王素節鄱陽郡王十一月壬申大赦改元庚寅李敬玄爲中書令十二月戊午來恒薛元起爲河南河北道大使二年正月乙亥耕藉田庚辰京師地震四月太子左庶子張大安同中書門下三品五月吐蕃寇扶州八月辛亥劉仁軌爲洮河軍鎮守使十月壬辰徙封顯爲英王更名哲十二月乙卯募關內河東猛士以伐吐蕃是歲西突厥及吐蕃寇安西冬無雪三年正月丙子李敬玄爲洮河道行軍大總管以伐吐蕃癸未遣

使募河南河北猛士以伐吐蕃四月丁亥以旱避正殿慮囚戊申大赦改明年爲通乾元年癸丑涇州民生子異體連心五月壬戌如九成宮大雨霖九月辛酉至自九成宮癸亥張文瓘薨丙寅李敬玄劉審禮及吐蕃戰于青海敗績審禮死之十月丙申停劔南隴右歲貢丙午密王元曉薨閏十一月丙申雨木冰壬子來恒薨十二月癸丑罷通乾號

調露元年正月戊子如東都庚戌戴至德薨四月辛酉郝處俊爲侍中五月丙戌皇太子監國戊戌作紫桂宮六月辛亥大赦改元吏部侍郎裴行儉伐西突厥九月壬午行儉敗西突厥執其可汗都支十月突厥溫傳奉職二部寇邊單于大都護府長史蕭嗣業伐之十一月戊寅高智周罷甲辰禮部尚書裴行儉爲定襄道行軍大總管以伐突厥

永隆元年二月癸丑如汝州溫湯丁巳如少室山乙丑如東都三月裴行儉及突厥戰于黑山敗之四月乙丑如紫桂宮戊辰黃門侍郎裴炎崔知溫中書侍郎王德真同中書門下三品五月丁酉太白經天七月巳卯吐蕃寇河源辛巳李敬玄及吐蕃戰于湟川敗績左武衛將軍黑齒常之為河源軍經略大使丙申江王元祥薨突厥寇雲州都督竇懷哲敗之八月丁未如東都丁巳貶李敬玄為衡州刺史甲子廢皇太子為庶人乙丑立英王哲為皇太子大赦改元賜酺三日巳巳貶張大安為普州刺史九月甲申王德真罷十月壬寅降封曹王明為零陵郡王戊辰至自東都十一月壬申朔日有食之

開耀元年正月乙亥突厥寇原慶二州辛巳賜京官九品以上酺三日癸巳裴行儉為定襄道行軍大總管以伐突厥巳亥減殿中太僕馬省諸方貢獻免雍岐華同四州二歲租河南河北一年調二月丙午皇太子釋奠于國學三月辛卯郝處俊罷五月乙酉常州人劉龍子謀反伏誅丙戌定襄道副總管曹懷舜及突厥戰于橫水敗績巳丑黑齒常之及吐蕃戰于良非川敗之六月壬子永嘉郡王暉有罪伏誅七月巳丑以太平公主下嫁赦京師甲午劉仁軌罷左僕射閏月丁未裴炎為侍中崔知溫薛元超守中書令庚戌以餌藥皇太子監國庚申裴行儉及突厥戰敗之八月丁卯以河南河北大水遣使賑乏絕室廬壞者給復一年溺死者贈物人三段九月丙申有彗星出于天市壬戌裴行儉俘突厥溫傳可汗阿史那伏念以獻乙丑改元赦定襄軍及諸道緣征官吏兵募十月丙寅朔日有食之十一月癸卯徙庶人賢于巴州永淳元年二月癸未以孫重照生滿月大赦改元賜酺三日是月

突厥車薄咽麪寇邊三月戊午立重照爲皇太孫四月甲子朔日有食之丙寅如東都皇太子監國辛未裴行儉爲金牙道行軍大總管率三總管兵以伐突厥安西副都護王方翼及車薄咽麪戰于熱海敗之丁亥黃門侍郎郭待舉兵部侍郎岑長倩祕書員外少監郭正一吏部侍郎魏玄同與中書門下同承受進止平章事五月乙卯洛水溢六月甲子突厥骨咄祿寇邊嵐州刺史王德茂死之是月大蝗人相食七月作萬泉宮己亥作奉天宮庚申零陵郡王明自殺九月吐蕃寇柘州驍衛郎將李季逸伐之十月甲子京師地震丙寅黃門侍郎劉齊賢同中書門下平章事

弘道元年正月甲午幸奉天宮二月庚午突厥寇定州刺史霍王元軌敗之三月庚寅突厥寇單于都護府司馬張行師死之庚子李義琰罷丙午有彗星出于五車癸丑崔知溫薨四月己未如東

都壬申郭待舉郭正一同中書門下平章事甲申綏州部落稽白鐵余寇邊右武衛將軍程務挺敗之五月乙巳突厥寇蔚州刺史李思儉死之七月甲辰徙封輪爲豫王改名旦薛元超罷八月乙丑皇太子朝于東都皇太孫留守京師丁卯滹沱溢己巳河溢壞河陽城九月己丑以太平公主子生赦東都十月癸亥幸奉天宮十一月戊戌右武衛將軍程務挺爲單于道安撫大使以伐突厥辛丑皇太子監國丁未如東都戊申裴炎劉齊賢郭正一兼于東宮平章事十二月丁巳改元大赦是夕皇帝崩于貞觀殿年五十六諡曰天皇帝天寶八載改諡天皇帝大聖皇帝十三載增諡天皇帝大聖大弘孝皇帝

贊曰小雅曰赫赫宗周褒姒滅之此周幽王之詩也是時幽王雖亡而太子宜臼立是爲平王而詩人乃言滅之者以爲文武之業

于是蕩盡東周雖在不能復興矣其曰滅者甚疾之之辭也武氏之亂唐之宗室戕殺殆盡其賢士大夫不免者十八九以太宗之治其遺德餘烈在人者未遠而幾于遂絕其爲惡豈一褒姒之比耶以太宗之明昧于知子廢立之際不能自決卒用昏童高宗溺愛衽席不戒履霜之漸而毒流天下貽禍邦家嗚呼父子夫婦之間可謂難哉可不慎哉

本紀第三

終

西川中鳳圖  
氏圖南甫

唐書二

本紀第四

西川中鳳圖  
氏圖南甫

唐書四

則天順聖皇后武氏諱嬰并州文水人也父士護官至工部尚書荆州都督封應國公后年十四太宗聞其有色選爲才人太宗崩后削髮爲比丘尼居于感業寺高宗幸感業寺見而悅之復召入宮久之立爲昭儀進號宸妃永徽六年高宗廢皇后王氏立宸妃爲皇后高宗自顯慶後多苦風疾百司奏事時時令后決之常稱旨由是參豫國政后既專寵與政乃數上書言天下利害務收人心而高宗春秋高苦疾后益用事遂不能制高宗悔陰欲廢之而謀洩不果上元元年高宗號天皇皇后亦號天后天下之人謂之二聖弘道元年十二月高宗崩遺詔皇太子卽皇帝位軍國大務不決者兼取天后進止甲子皇太子卽皇帝位尊后爲皇太后臨朝稱制大赦賜九品以下勳官一級庚午韓王元嘉爲太尉霍王



元軌爲司徒舒王元名爲司空甲戌劉仁軌爲尚書左僕射裴炎爲中書令劉齊賢爲侍中同中書門下三品戊寅郭待舉魏玄同岑長倩同中書門下三品癸未郭正一罷

光宅元年正月癸未改元嗣聖癸巳左散騎常侍韋弘敏爲太府卿同中書門下三品二月戊午廢皇帝爲廬陵王幽之己未立豫王旦爲皇帝妃劉氏爲皇后立永平郡王成器爲皇太子大赦改元爲文明賜文武官五品以上爵一等九品以上勳兩轉老人版授官賜粟帛職官五品以上舉所知一人皇太后仍臨朝稱制庚申廢皇太孫重照爲庶人殺庶人賢于巴州甲子皇帝率群臣上尊號于武成殿丁卯冊皇帝丁丑太常卿王德真爲侍中中書侍郎劉禕之同中書門下三品庚辰贈玉清觀道士太中大夫王遠知金紫光祿大夫三月丁亥徙封上金爲畢王素節葛王四月丁

巳滕王元嬰薨辛酉徙封上金爲澤王素節許王癸酉遷廬陵王于房州丁丑又遷于均州五月癸巳以大喪禁射獵閏月甲子禮部尚書武承嗣爲太常卿同中書門下三品七月戊午廣州崑崙殺其都督路元叟乙丑突厥寇朔州左武衛大將軍程務挺敗之辛未有彗星出于西方八月庚寅葬天皇大帝于乾陵丙午武承嗣罷九月甲寅大赦改元旗幟尚白易內外官服青者以碧大易官名改東都爲神都追尊老子母爲先天太后丙辰左威衛大將軍程務挺爲單于道安撫大使以備突厥己巳追尊武氏五代祖克巳爲魯國公妣裴氏爲魯國夫人高祖居常爲太尉北平郡王妣劉氏爲王妃曾祖儉爲太尉金城郡王妣宋氏爲王妃祖華爲太尉太原郡王妣趙氏爲王妃考士護爲太師魏王妣楊氏爲王妃丁丑柳州司馬李敬業舉兵于揚州以討亂貶韋弘敏爲汾州

刺史十月癸未楚州司馬李崇福以山陽安宜鹽城三縣歸于敬業甲申左玉鈐衛大將軍梁郡公季逸爲揚州道行軍大總管左金吾衛大將軍李知十爲副率兵三十萬以拒李敬業丁亥左肅政臺御史大夫騫味道檢校內史同鳳閣鸞臺三品鳳閣舍人李景湛同鳳閣鸞臺平章事壬辰李敬業克潤州丙申殺裴炎追諡五代祖魯國公曰靖高祖北平郡王曰恭肅曾祖金城郡王曰義康祖太原郡王曰安成考魏王曰忠孝丁酉曲赦揚楚二州復敬業姓徐氏貶劉齊賢爲辰州刺史李景湛罷右史沈君諒著作郎崔營爲正諫大夫同鳳閣鸞臺平章事十一月辛亥左鷹揚衛大將軍黑齒常之爲江南道行軍大總管庚申右監門衛將軍蘇季祥及徐敬業戰于阿谿死之乙丑徐敬業將王那相殺敬業降丁卯郭待舉罷鸞臺侍郎韋方質爲鳳閣侍郎同鳳閣鸞臺平章事

十二月戊子遣御史察風俗癸卯殺程務挺

垂拱元年正月丁未大赦改元庚戌騫味道守內史戊辰劉仁軌薨二月乙巳春官尚書武承嗣秋官尚書裴居道右肅政臺御史大夫韋思謙同鳳閣鸞臺三品突厥寇邊左玉鈐衛中郎將淳于處平爲陽曲道行軍總管以擊之沈君諒罷三月崔營罷丙辰遷廬陵王于房州辛酉武承嗣罷辛未頒垂拱格四月丙子貶騫味道爲青州刺史癸未淳于處平及突厥戰于忻州敗績五月丙午裴居道爲納言封皇帝子成義爲恒王壬戌以旱慮囚壬申韋方質同鳳閣鸞臺三品六月天官尚書韋待價同鳳閣鸞臺三品九月丁卯揚州地生毛十一月癸卯韋待價爲燕然道行軍大總管以擊突厥

二年正月辛酉大赦賜酺三日內外官勳一轉二月辛未朔日有

蝕之三月戊申作銅匱四月庚辰岑長倩爲內史五月丙午裴居道爲內史六月辛未蘇良嗣同鳳閣鸞臺三品己卯韋思謙守納言十月己巳有山出于新豐縣改新豐爲慶山赦囚給復一年賜酺三日十二月免并州百姓庸調終其身是冬無雪

三年閏正月丁卯封皇帝子隆基爲楚王隆範衛王隆業趙王二月己亥以旱避正殿減膳丙辰突厥寇昌平黑齒常之擊之三月乙丑韋思謙罷四月辛丑追號孝敬皇帝妃裴氏曰哀皇后葬于恭陵癸丑以旱慮囚命京官九品以上言事壬戌裴居道爲納言五月丙寅夏官侍郎張光輔爲鳳閣侍郎同鳳閣鸞臺平章事庚午殺劉禕之七月丁卯冀州雌雞化爲雄乙亥京師地震雨金于廣州八月壬子魏玄同兼檢校納言交趾人李嗣仙殺安南都護劉延祐據交州桂州司馬曹玄靜敗之是月突厥寇朔州燕然道

行軍大總管黑齒常之敗之九月己卯虢州人楊初成自稱郎將募州人迎廬陵王于房州不果見殺十月庚子右監門衛中郎將曩寶璧及突厥戰敗績十二月壬辰韋待價爲安息道行軍大總管安西大都護閻溫古副之以擊吐蕃是歲大饑

四年正月甲子增七廟立高祖太宗高宗廟于神都庚午毀乾元殿作明堂三月壬戌殺麟臺少監周思茂四月戊戌殺太子通事舍人郝象賢五月庚申得寶圖于洛水乙亥加尊號爲聖母神皇六月丁亥朔日有食之得瑞石于汜水七月丁巳大赦改寶圖爲天授聖圖洛水爲永昌洛水封其神爲顯聖侯加特進禁漁釣改嵩山爲神岳封其神爲天中王太師使持節大都督賜酺五日戊午京師地震八月戊戌神都地震丙午博州刺史琅邪郡王冲舉兵以討亂遣左金吾衛大將軍丘神勣拒之戊申冲死之庚戌越

王貞舉兵于豫州以討亂辛亥曲赦博州九月丙辰左豹韜衛大將軍麴崇裕為中軍大總管岑長倩為後軍大總管以拒越王貞張光輔為諸軍節度削越王貞及琅邪郡王沖屬籍改其姓為虺氏貞死之丙寅赦豫州殺韓王元嘉魯王靈夔范陽郡王靄黃國公誤東莞郡公融及常樂公主皆改其姓為虺氏丁卯左肅政臺御史大夫騫味道夏官侍郎王本立同鳳閣鸞臺平章事十月辛亥大風拔木十一月辛酉殺濟州刺史薛頴及其弟駙馬都尉紹十二月乙酉殺霍王元軌江都郡王緒及殿中監裴承光大殺唐宗室流其幼者于嶺南己亥殺騫味道己酉拜洛受圖辛亥改明堂為萬象神宮大赦

永昌元年正月乙卯享于萬象神宮大赦改元賜酺七日丁巳舒王元名為司徒戊午布政于萬象神宮頒九條以訓百官己未朗

州雌雞化為雄二月丁酉尊考太師魏忠孝王曰周忠孝太皇置崇先府官戊戌追諡妣楊氏曰周忠孝太后太原郡王曰周安成王妃趙氏為王妃金城郡王曰魏義康王妃宋氏為王妃北平郡王曰趙肅恭王妃劉氏為王妃五代祖魯國公曰太原靖王夫人裴氏為王妃三月甲子張光輔守納言癸酉天官尚書武承嗣為納言張光輔守內史四月甲辰殺汝南郡王瑋鄱陽郡公譚廣漢郡公謚汶山郡公綦零陵郡王俊廣都郡公壽徙其家于嵩州己酉殺天官侍郎鄧玄挺五月丙辰韋待價及吐蕃戰于寅識迦河敗績己巳白馬寺僧薛懷義為新平道行軍大總管以擊突厥七月丁巳流紀王慎于巴州改其姓為虺氏丙子流韋待價于繡州殺閻溫古戊寅王本立同鳳閣鸞臺三品八月癸未薛懷義為新平道中軍大總管以擊突厥甲申殺張光輔洛州司馬弓嗣業洛

陽令弓嗣明陝州參軍弓嗣古流人徐敬真乙未松州雌雞化爲  
雄辛丑殺陝州刺史郭正一丁未殺相州刺史弓志元蒲州刺史  
弓彭祖尚方監王令基九月庚戌殺恒山郡王丞乾之子厥閏月  
甲午殺魏玄同夏官侍郎崔營戊申殺彭州長史劉易從十月癸  
丑殺涼州都督李光誼丁巳殺陝州刺史劉延景戊午殺右武威  
衛大將軍黑齒常之右鷹揚衛將軍趙懷節己未殺嗣鄭王璿丁  
卯春官尚書范履冰鳳閣侍郎邢文偉同鳳閣鸞臺平章事  
天授元年正月庚辰大赦改元曰載初以十一月爲正月十二月  
爲臘月來歲正月爲一月以周漢之後爲二王後封舜禹湯之裔  
爲三恪周隋同列國封其嗣乙未除唐宗室屬籍臘月丙寅殺劉  
齊賢一月戊子王本立罷邢文偉爲內史岑長倩武承嗣同鳳閣  
鸞臺三品鳳閣侍郎武攸寧爲納言甲午流韋方質于儋州二月

丁卯殺地官尚書王本立三月乙酉以旱減膳丁亥蘇良嗣薨五  
月戊子殺范履冰己亥殺梁郡公季逸六月戊申殺汴州刺史柳  
明肅七月辛巳流舒王元名于和州頒大雲經于天下壬午殺豫  
章郡王亶丁亥殺澤王上金許王素節甲午赦永昌縣癸卯殺太  
常丞蘇踐言八月辛亥殺許王素節之子璟曾江縣令白令言甲  
寅殺裴居道壬戌殺將軍阿史那惠右司郎中喬知之癸亥殺尚  
書右丞張行廉太州刺史杜儒童甲子殺流人張楚金戊辰殺流  
人元萬頃苗神客辛未殺南安郡王穎鄴國公昭及諸宗室李直  
李敞李然李勳李策李越李黯李玄李英李志業李知言李玄貞  
九月乙亥殺鉅鹿郡公晃麟臺郎裴望及其弟司膳丞璉壬午改  
國號周大赦改元賜酺七日乙酉加尊號曰聖神皇帝降皇帝爲  
皇嗣賜姓武氏皇太子爲皇孫丙戌立武氏七廟于神都追尊周

文王曰始祖文皇帝妣妣氏曰文定皇后四十代祖平王少子武  
曰睿祖康皇帝妣姜氏曰康惠皇后太原靖王曰嚴祖成皇帝妣  
曰成莊皇后趙肅恭王曰肅祖章敬皇帝妣曰章敬皇后魏義康  
王曰烈祖昭安皇帝妣曰昭安皇后周安成王曰顯祖文穆皇帝  
妣曰文穆皇后忠孝太皇曰太祖孝明高皇帝妣曰孝明高皇后  
追封伯父及兄弟之子爲王堂兄爲郡王諸姊妹爲長公主堂姊  
妹爲郡主司賓卿史務滋守納言鳳閣侍郎宗秦客檢校內史給  
事中傅游藝爲鸞臺侍郎同鳳閣鸞臺平章事十月丁巳給復并  
州武興縣百姓子孫相承如漢豐沛甲子貶宗秦客爲遵化尉丁  
卯殺流人韋方質巳巳殺許王素節之子瑛琪琬瓚瑒琛唐臣  
辛未貶邢文偉爲珍州刺史置大雲寺封周公爲褒德王孔子爲  
隆道公改唐太廟爲享德廟以武氏七廟爲太廟

二年一月甲戌改置社稷旗幟尚赤戊寅殺雅州刺史劉行實及  
其弟涇州刺史行瑜尚衣奉御行感兄子左鷹揚衛將軍虔通戊  
子武承嗣爲文昌左相庚寅賜酺乙未殺丘神勣左豹韜衛將軍  
衛蒲山庚子殺史務滋臘月巳未始用周臘四月壬寅朔日有蝕  
之丙午大赦五月丁亥大風折木岑長倩爲武威道行軍大總管  
以擊吐蕃六月庚戌左肅政臺御史大夫格輔元爲地官尚書鸞  
臺侍郎樂思晦鳳閣侍郎任知古同鳳閣鸞臺平章事七月庚午  
徙關內七州戶以實神都八月戊申武攸寧罷夏官尚書歐陽通  
爲司禮卿兼判納言事庚申殺右玉鈐衛大將軍張虔勗九月乙  
亥殺岐州刺史雲弘嗣壬辰殺傅游藝癸巳左羽林衛大將軍武  
攸寧守納言冬官侍郎裴行本洛州司馬狄仁傑爲地官侍郎同  
鳳閣鸞臺平章事十月巳酉殺岑長倩歐陽通格輔元壬戌殺樂

唐書四  
思晦左衛將軍李安靜

長壽元年一月戊辰夏官尚書楊執柔同鳳閣鸞臺平章事庚午  
貶任知古爲江夏令狄仁傑彭澤令流裴行本于嶺南乙亥殺右  
衛大將軍泉獻誠庚辰司刑卿李遊道爲冬官尚書同鳳閣鸞臺  
平章事二月戊午秋官尚書袁智弘同鳳閣鸞臺平章事四月丙  
申朔日有食之大赦改元如意五月洛水溢七月又溢八月甲戌  
河溢壞河陽縣戊寅武承嗣武攸寧楊執柔罷秋官侍郎崔元綜  
爲鸞臺侍郎夏官侍郎李昭德爲鳳閣侍郎權檢校天官侍郎姚  
璿爲文昌左丞檢校地官侍郎李元素爲文昌右丞營繕大匠王  
璿爲夏官尚書司賓卿崔神基同鳳閣鸞臺平章事九月戊戌大  
霧庚子大赦改元改元九月社賜酺七日癸卯以并州爲北都癸  
丑流李遊道袁智弘王璿崔神基李元素于嶺南十月丙戌武威

道行軍總管王季傑敗吐蕃克四鎮

二年臘月癸亥殺皇嗣妃劉氏德妃竇氏丁卯降封皇孫成器爲  
壽春郡王恒王成義衡陽郡王楚王隆基臨淄郡王衛王隆範巴  
陵郡王趙王隆業彭城郡王一月庚子夏官侍郎婁師德同鳳閣  
鸞臺平章事甲寅殺尚方監裴匪躬內常侍范雲仙三月己卯殺  
左衛員外大將軍阿史那元慶白潤府果毅薛大信五月乙未殺  
冬官尚書蘇幹相州刺史來同敏癸丑河溢棣州九月丁亥朔日  
有蝕之乙未加號金輪聖神皇帝大赦賜酺七日作七寶庚子追  
尊烈祖昭安皇帝曰渾元昭安皇帝顯祖文穆皇帝曰立極文穆  
皇帝太祖孝明高祖皇帝曰無上孝明高祖皇帝辛丑姚璿罷文昌  
右丞韋巨源同鳳閣鸞臺平章事秋官侍郎陸元方爲鸞臺侍郎  
同鳳閣鸞臺平章事司賓卿豆盧欽望守內史

延載元年臘月甲戌突厥默啜寇靈州右鷹揚衛大將軍李多祚  
敗之一月甲午婁師德為河源積石懷遠等軍營田大使二月庚  
午薛懷義為伐逆道行軍大總管領十八將軍以擊默啜乙亥以  
早慮囚已卯武威道大總管王季傑及吐蕃戰于冷泉敗之三月  
甲申鳳閣舍人蘇味道為鳳閣侍郎同鳳閣鸞臺平章事李昭德  
檢校內史薛懷義為朔方道行軍大總管擊默啜昭德為朔方道  
行軍長史味道為司馬四月壬戌常州地震五月甲午加號越古  
金輪聖神皇帝大赦改元賜酺七日七月癸未嵩嶽山人武什方  
為正諫大夫同鳳閣鸞臺平章事八月什方罷戊辰王季傑為瀚  
海道行軍總管已巳司賓少卿姚壽守納言左肅政臺御史大夫  
楊再思為鸞臺侍郎洛州司馬杜景佺檢校鳳閣侍郎同鳳閣鸞  
臺平章事戊寅流崔元綜于振州九月壬午朔日有蝕之壬寅貶

李昭德為南賓尉十月壬申文昌右丞李元素為鳳閣侍郎右肅  
政臺御史中丞周允元檢校鳳閣侍郎同鳳閣鸞臺平章事嶺南  
獠寇邊容州都督張玄遇為桂永等州經略大使癸酉雨水冰  
天冊萬歲元年一月辛巳加號慈氏越古金輪聖神皇帝改元證  
聖大赦賜酺三日戊子貶豆盧欽望為趙州刺史韋巨源鄜州刺  
史杜景佺溱州刺史蘇味道集州刺史陸元方綏州刺史丙申萬  
象神宮火丙午王季傑為朔方行軍總管以擊突厥二月巳酉朔  
日有蝕之壬子殺薛懷義甲子罷慈氏越古號三月丙辰周允元  
薨四月戊寅建大周萬國頌德天樞七月辛酉吐蕃寇臨洮王季  
傑為肅邊道行軍大總管以擊之九月甲寅祀南郊加號天冊金  
輪大聖皇帝大赦改元賜酺九日以崇先廟為崇尊號  
萬歲通天元年臘月甲戌如神岳甲申封于神岳改元曰萬歲登



封大赦免今歲租稅賜酺十日丁亥禪于少室山己丑給復洛州  
二年登封告成縣三年癸巳復于神都一月甲寅婁師德為肅邊  
道行軍副總管以擊吐蕃己巳改崇尊廟為太廟二月辛巳尊神  
岳天中王為神岳天中黃帝天靈妃為天中黃后三月壬寅王季  
傑婁師德及吐蕃戰于素羅汗山敗績丁巳復作明堂改曰通天  
宮大赦改元賜酺七日四月癸酉檢校夏官侍郎孫元亨同鳳閣  
鸞臺平章事庚子貶婁師德為原州都督府司馬五月壬子契丹  
首領松漠都督李盡忠歸誠州刺史孫萬榮陷營州殺都督趙文  
翹乙丑左鷹揚衛將軍曹仁師右金吾衛大將軍張玄遇左威衛  
大將軍李多祚司農少卿麻仁節等擊之七月辛亥春官尚書武  
三思為榆關道安撫大使納言姚璿為副以備契丹八月丁酉張  
玄遇曹仁師麻仁節等及契丹戰于黃麋谷敗績執玄遇仁節九

月庚子同州刺史武攸宜為清邊道行軍大總管以擊契丹丁巳  
吐蕃寇涼州都督許欽明死之庚申并州長史王方慶為鸞臺侍  
郎殿中監李道廣同鳳閣鸞臺平章事十月辛卯契丹寇冀州刺  
史陸寶積死之甲午慮囚

神功元年正月壬戌殺李元素孫元亨洛州錄事參軍綦連耀箕  
州刺史劉思禮知天官侍郎事石抱忠劉奇給事中周譚鳳閣舍  
人王勳前涇州刺史王勔太子司議郎路敬淳司門員外郎劉順  
之右司員外郎宇文全志來庭縣主簿柳璆癸亥突厥默啜寇勝  
州平狄軍副使安道買敗之甲子婁師德守鳳閣侍郎同鳳閣鸞  
臺平章事一月乙巳慮囚三月庚子王季傑及孫萬斬戰于東碛  
石谷敗績季傑死之戊申赦河南北四月戊辰置九鼎于通天宮  
癸酉前益州大都督府長史王及善為內史癸未右金吾衛大將

軍武懿宗爲神兵道行軍大總管及右豹韜衛將軍何迦密以擊契丹五月癸卯婁師德爲清邊道行軍副大總管右武衛將軍沙吒忠義爲清邊中道前軍總管以擊契丹六月丁卯殺監察御史李昭德司僕少卿來俊臣己卯尚方少監宗楚客同鳳閣鸞臺平章事戊子特進武承嗣春官尚書武三思同鳳閣鸞臺三品辛卯婁師德安撫河北七月丁酉武承嗣武三思罷八月丙戌姚壽罷九月壬寅大赦改元賜酺七日庚戌婁師德守納言十月甲子給復徇忠立節二縣一年閏月甲寅檢校司刑卿幽州都督狄仁傑爲鸞臺侍郎司刑卿杜景佺爲鳳閣侍郎同鳳閣鸞臺平章事聖曆元年正月甲子大赦改元賜酺九日丙寅宗楚客罷丁亥李道廣罷三月己巳召廬陵王千房州戊子廬陵王至自房州四月庚寅赦神都及河北辛丑婁師德爲隴右諸軍大使檢校河西營

田事五月庚午禁屠六月乙卯大風拔木七月辛未杜景佺罷八月突厥寇邊戊子左豹韜衛將軍閻知微降于突厥寇邊甲午王方慶罷庚子春官尚書武三思檢校內史狄仁傑兼納言司屬卿武重規爲天兵中道大總管沙吒忠義爲天兵西道前軍總管幽州都督張仁亶爲天兵東道總管左羽林衛大將軍李多祚右羽林衛大將軍閻敬容爲天兵西道後軍總管以擊突厥癸丑突厥寇蔚州乙卯寇定州刺史孫彥高死之九月甲子夏官尚書武攸寧同鳳閣鸞臺三品戊辰突厥寇趙州長史唐波若降于突厥刺史高叡死之突厥寇相州沙吒忠義爲河北道前軍總管將軍陽基副之李多祚爲後軍總管大將軍富福信爲奇兵總管以禦之壬申立廬陵王顯爲皇太子大赦賜酺五日甲戌皇太子爲河北道行軍元帥以擊突厥戊寅狄仁傑爲河北道行軍副元帥檢校

唐書四  
納言辛巳試天官侍郎蘇味道爲鳳閣侍郎同鳳閣鸞臺平章事  
十月癸卯狄仁傑爲河北道安撫大使夏官侍郎姚元崇麟臺少  
監李嶠同鳳閣鸞臺平章事族閭知微

二年正月壬戌封皇嗣且爲相王臘月戊子左肅政臺御史中丞  
吉頊爲天官侍郎檢校右肅政臺御史中丞魏元忠爲鳳閣侍郎  
同鳳閣鸞臺平章事辛亥賜皇太子姓武氏大赦一月庚申武攸  
寧罷二月己丑如緱氏辛卯如嵩陽丁酉復于神都三月甲戌以  
隋唐爲二王後婁師德爲納言四月壬辰魏元忠檢校并州大都  
督府長史天兵軍大總管婁師德副之以備突厥辛丑婁師德爲  
隴右諸軍大使甲辰慮囚七月丙辰神都大雨浴水溢八月庚子  
王及善爲文昌左相同鳳閣鸞臺平章事太子宮尹豆盧欽望爲  
文昌右相同鳳閣鸞臺三品楊再思罷丁未試天官侍郎陸元方

爲鸞臺侍郎同鳳閣鸞臺平章事婁師德薨戊申武三思爲內史  
九月乙亥如福昌縣曲赦戊寅復于神都庚辰王及善薨是秋黃  
河溢十月丁亥吐蕃首領贊婆來

久視元年正月戊午貶吉頊爲琰川尉壬申武三思罷臘月辛巳  
封皇太子之子重潤爲邵王庚寅陸元方罷司禮卿阿史那斛瑟  
羅爲平西軍大總管丁酉狄仁傑爲內史庚子文昌左相韋巨源  
爲納言乙巳如嵩山一月丁卯如汝州溫湯戊寅復于神都作三  
陽宮二月乙未豆盧欽望罷三月癸丑夏官尚書唐奉一爲天兵  
中軍大總管以備突厥四月戊申如三陽宮五月己酉朔日有蝕  
之癸丑大赦改元罷天冊金輪大聖號賜酺五日給復告成縣一  
年閏七月戊寅復于神都已丑天官侍郎張錫爲鳳閣侍郎同鳳  
閣鸞臺平章事李嶠罷丁酉吐蕃寇涼州隴右諸軍州大使唐休

唐書四  
璟敗之于洪源谷八月庚戌魏元忠爲隴右諸軍州大總管以擊吐蕃庚申斂天下僧錢作大像九月辛丑狄仁傑薨十月辛亥魏元忠爲蕭關道行軍大總管以備突厥甲寅復唐正月大赦丁巳韋巨源罷文昌右丞韋安石爲鸞臺侍郎同鳳閣鸞臺平章事丁卯如新安隴澗山曲赦壬申復于神都十二月甲寅突厥寇隴右長安元年正月丁丑改元大足二月巳酉鸞臺侍郎李懷遠同鳳閣鸞臺平章事三月丙申流張錫于循州四月丙午大赦癸丑姚元崇檢校并州以北諸軍州兵馬五月乙亥如三陽宮丁丑魏元忠爲靈武道行軍大總管以備突厥丙申天官侍郎顧琮同鳳閣鸞臺平章事六月庚申夏官侍郎李迥秀同鳳閣鸞臺平章事辛未赦告成縣七月甲戌復于神都乙亥揚楚常潤蘇五州地震壬午蘇味道按察幽平等州兵馬甲申李懷遠罷九月壬申殺邵王

重潤及永泰郡王王塔武延基十月壬寅如京師辛酉大赦改元給復關內三年賜酺三日丙寅魏元忠同鳳閣鸞臺三品十一月壬申武三思罷戊寅改含元宮爲大明宮

二年正月突厥寇鹽州三月丙戌李迥秀安置山東軍馬檢校武騎兵庚寅突厥寇并州雍州長史薛季昶持節山東防禦大使以備之七月甲午突厥寇代州八月辛亥劔南六州地震九月乙丑朔日有蝕之壬申突厥寇忻州巳卯吐蕃請和十月甲辰顧琮薨戊申吐蕃寇悉州茂州都督陳大慈敗之甲寅姚元崇同鳳閣鸞臺平章事蘇味道韋安石李迥秀同鳳閣鸞臺三品十一月甲子相王旦爲司徒戊子祀南郊大赦賜酺三日十二月甲午魏元忠爲安東道安撫使

三年三月壬戌朔日有蝕之四月庚子相王旦罷吐蕃來求婚乙

已以早避正殿閏月庚午成均祭酒李嶠同鳳閣鸞臺平章事巳  
卯李嶠知納言事七月壬寅正諫大夫朱敬則同鳳閣鸞臺平章  
事庚戌檢校涼州都督唐休璟爲夏官尚書同鳳閣鸞臺平章事  
八月乙酉京師大雨雹九月庚寅朔日有蝕之丁酉貶魏元忠爲  
高要尉十月丙寅如神都十二月丙戌天下置關三十

四年正月丁未作興泰宮壬子天官侍郎韋嗣立爲鳳閣侍郎同  
鳳閣鸞臺三品二月癸亥貶李迥秀爲廬州刺史壬申朱敬則罷  
三月丁亥進封皇孫平恩郡王重福爲譙王巳亥夏官侍郎宗楚  
客同鳳閣鸞臺平章事貶蘇味道爲坊州刺史四月壬戌韋安石  
知納言事李嶠知內史事丙子如興泰宮赦壽安縣給復一年五  
月丁亥大風拔木六月辛酉姚元之罷乙丑天官侍郎崔玄暉爲  
鸞臺侍郎同鳳閣鸞臺平章事丁丑李嶠同鳳閣鸞臺三品壬午

相王府長史姚元之兼知夏官尚書同鳳閣鸞臺三品七月丙戌  
左肅政臺御史大夫楊再思守內史甲午復于神都貶宗楚客爲  
原州都督八月庚申唐休璟兼幽營二州都督安東都護九月壬  
子姚元之爲靈武道行軍大總管十月辛酉元之爲靈武道安撫  
大使甲戌判秋官侍郎張柬之同鳳閣鸞臺平章事壬子懷州長  
史房融爲正諫大夫同鳳閣鸞臺平章事十一月丁亥天官侍郎  
韋承慶行鳳閣侍郎同鳳閣鸞臺平章事李嶠罷十二月丙辰韋  
嗣立罷

五年正月壬午大赦庚寅禁屠癸卯張柬之崔玄暉及左羽林衛  
將軍敬暉檢校左羽林衛將軍桓彥範司刑少卿袁恕巳左羽林  
衛將軍李湛薛思行趙承恩右羽林衛將軍楊元琰左羽林衛大  
將軍李多祚職方郎中崔泰之庫部員外郎朱敬則司刑評事冀

仲甫檢校司農少卿兼知總監翟世言內直郎王同皎率左右羽林兵以討亂麟臺監張易之春官侍郎張昌宗汴州刺史張昌期司禮少卿張同休通事舍人張景雄伏誅丙午皇帝復于位丁未徙后于上陽宮戊申上后號曰則天大聖皇帝十一月崩諡曰大聖則天皇后唐隆元年改爲天后景雲元年改爲大聖天后延和元年改爲天后聖帝未幾改爲聖后開元四年改爲則天皇后天寶八載加諡則天順聖皇后

中宗太和大聖大昭孝皇帝諱顯高宗第七子也母曰則天順聖皇后武氏高宗崩以皇太子卽皇帝位而皇太后臨朝稱制嗣聖元年正月廢居于均州又遷于房州聖曆二年復爲皇太子太后老且病神龍元年正月張柬之等以羽林兵討亂甲辰皇太子監國大赦改元丙午復于位大赦賜文武官階爵民酺五日免今歲

租賦給復房州三年放宮女三千人相王旦爲安國相王太尉同鳳閣鸞臺三品庚戌張柬之袁恕已同鳳閣鸞臺三品崔玄暉守內史敬暉爲納言桓彥範守納言二月甲寅復國號唐貶韋承慶爲高要尉流房融于高州楊再思同中書門下三品姚元之罷甲子皇后韋氏復于位大赦賜酺三日復宗室死于周者官爵丙寅太子賓客武三思爲司空同中書門下三品貶譙王重福爲濮州刺史丁卯右散騎常侍駙馬都尉武攸暨爲司徒辛未安國相王旦罷甲戌太子少詹事祝欽明同中書門下三品韋安石罷進封義興郡王重俊爲衛王北海郡王重茂溫王丁丑武三思武攸暨罷三月甲申詔文明後破家者昭洗之還其孫蔭已丑袁恕已守中書令四月辛亥桓彥範爲侍中袁恕已爲中書令丁卯高要尉魏元忠爲衛尉卿同中書門下平章事辛未敬暉爲侍中甲戌

魏元忠崔玄暉刑部尚書韋安石爲吏部尚書太子右庶子李懷遠爲左散騎常侍涼州都督唐休璟爲輔國大將軍同中書門下三品乙亥張柬之爲中書令五月壬午遷武氏神主于崇恩廟乙酉立太廟社稷于東都戊子復周隋二王後壬辰進封兄成紀郡王千里爲成王甲午敬暉桓彥範張柬之袁恕已崔玄暉罷韋安石兼檢校中書令魏元忠兼侍中甲辰唐休璟爲尚書左僕射特進豆盧欽望爲尚書右僕射同中書門下三品六月壬子左驍衛大將軍裴思諒爲靈武道行軍大總管以備突厥癸亥韋安石爲中書令魏元忠爲侍中楊再思檢校中書令豆盧欽望平章軍國重事七月辛巳太子賓客韋巨源同中書門下三品甲辰洛水溢八月戊申給復河南洛陽二縣一年壬戌追冊妃趙氏爲皇后乙亥祔孝敬皇帝于東都太廟皇后見于廟丁丑幸洛城南門觀關

象九月壬午祀天地于明堂大赦賜文武官勳爵民爲父後者占爵一級醜三日癸巳韋巨源罷十月癸亥幸龍門乙丑獵于新安辛未魏元忠爲中書令楊再思爲侍中十一月戊寅上尊號曰應天皇帝皇后曰順天皇后壬午及皇后享于太廟大赦賜文武官階勳爵民醜三日巳丑幸洛城南門觀潑寒胡戲壬寅皇太后崩廢崇恩廟

二年正月戊戌吏部尚書李嶠同中書門下三品中書侍郎于惟謙同中書門下平章事閏月丙午公主開府置官屬二月乙未禮部尚書韋巨源爲刑部尚書同中書門下三品丙申遣十道巡察使三月甲辰韋安石罷戶部尚書蘇瓌守侍中戊申唐休璟罷庚戌殺光祿卿駙馬都尉王同皎是月置員外官四月巳丑李懷遠罷巳亥雨毛于鄧縣辛丑洛水溢五月庚申葬則天大聖皇后六

月戊寅貶敬暉爲崖州司馬桓彥範瀧州司馬袁恕已賓州司馬  
崔玄暉白州司馬張柬之新州司馬七月戊申立衛王重俊爲皇  
太子丙寅魏元忠爲尚書右僕射兼中書令李嶠守中書令辛未  
左散騎常侍致仕李懷遠同中書門下三品流敬暉于嘉州桓彥  
範于瀧州袁恕已于環州崔玄暉于古州張柬之于瀧州八月丙  
子貶祝欽明爲申州刺史九月戊午李懷遠薨十月癸巳蘇瓌爲  
侍中戊戌至自東都十一月乙巳大赦賜行從官勳一轉十二月  
巳卯靈武軍大總管沙吒忠義及突厥戰于鳴沙敗績丙戌以突  
厥寇邊京師旱河北水減膳罷土木工蘇瓌存撫河北丙申魏元  
忠爲尚書左僕射

景龍元年正月丙辰以旱慮囚二月丙戌復武氏廟陵置令丞守  
戶如昭陵甲午褒德廟榮先陵置令丞四月庚寅赦雍州五月戊

千

戌右屯衛大將軍張仁亶爲朔方道行軍大總管以備突厥丙午  
假鴻臚卿臧思言使于突厥死之以旱避正殿減膳六月丁卯朔  
日有食之庚午雨土于陝州戊子吐蕃及姚州蠻寇邊姚儁道討  
擊使唐九徵敗之七月辛丑皇太子以羽林于騎兵誅武三思不  
克死之癸卯大赦壬戌李嶠爲中書令八月丙戌上尊號曰應天  
神龍皇帝皇后曰順天翊聖皇后魏元忠罷九月丁酉吏部侍郎  
蕭至忠爲黃門侍郎兵部尚書宗楚客左衛將軍兼太府卿紀處  
訥同中書門下三品于惟謙罷庚子大赦改元賜文武官階勳爵  
辛亥楊再思爲中書令韋巨源紀處訥爲侍中蘇瓌罷十月戊寅  
殺習藝館內教蘇安恒壬午有彗星出于西方十二月乙丑朔日  
有食之丁丑雨土

二年二月癸未有星隕于西南庚寅大赦進五品以上母妻封號



二等無妻者授其女婦人八十以上版授郡縣鄉君七月癸巳朔方道行軍大總管張仁亶同中書門下三品丁酉有星孛于胃昴十一月庚申西突厥寇邊御史中丞馮嘉賓使于突厥死之巳卯大赦賜酺三日癸未安西都護牛師獎及西突厥戰于火燒城死之是歲皇后妃王昭容賣官行墨敕斜封

三年二月巳丑及皇后幸玄武門觀宮女拔河爲宮市以嬉壬寅韋巨源爲尚書左僕射楊再思爲右僕射同中書門下三品壬子及皇后幸太常寺三月戊午宗楚客爲中書令蕭至忠守侍中太府卿韋嗣立守兵部尚書同中書門下三品中書侍郎兼檢校吏部侍郎崔湜守兵部侍郎趙彥昭爲中書侍郎同中書門下平章事戊寅禮部尚書韋溫爲太子少保同中書門下三品太常少卿鄭愔守吏部侍郎同中書門下平章事五月丙戌貶崔湜爲襄州

刺史鄭愔江州司馬六月癸巳太白晝見庚子以旱避正殿減膳撤樂詔括天下圖籍壬寅慮囚癸卯楊再思薨七月丙辰西突厥娑葛降辛酉許婦人非緣夫子封者陰其子孫癸亥慮囚庚辰澧水溢八月乙酉李嶠同中書門下三品特進韋安石爲侍中壬辰有星孛于紫宮九月戊辰吏部尚書蘇瓌爲尚書左僕射同中書門下三品十一月乙丑有事于南郊以皇后爲亞獻大赦賜文武官階爵入品者減考免關內今歲賦賜酺三日甲戌豆盧欽望薨十二月壬辰前宋國公致仕唐休璟爲太子少師同中書門下三品甲午如新豐溫湯甲辰赦新豐給復一年賜從官勳一轉乙巳至自新豐

四年正月丙寅及皇后微行以觀燈遂幸蕭至忠第丁卯微行以觀燈幸韋安石長寧公主第巳卯如始平二月壬午赦咸陽始平

給復一年癸未至自始平庚戌及后妃公主觀三品以上拔河三  
月以河源九曲予吐蕃庚申雨木冰井溢五月辛酉封嗣虢王邕  
爲汴王丁卯殺許州司兵參軍燕欽融丁丑剡縣地震六月皇后  
及安樂公主散騎常侍馬秦客及壬午皇帝崩年五十五謚曰孝  
和皇帝天寶十三年加謚大和大聖大昭孝皇帝

贊曰昔者孔子作春秋而亂臣賊子懼其于弑君篡國之主皆不  
黜絕之豈以其盜而有之者莫大之罪也不沒其實所以著其大  
惡而不隱歟自司馬遷班固皆作高后紀呂氏雖非篡漢而盜執  
其國政遂不敢沒其實豈其得聖人之意歟抑亦偶合于春秋之  
法也唐之舊史因之列武后于本紀蓋其所從來遠矣夫吉凶之  
于人猶影響也而爲善者得吉常多其不幸而罹于凶者有矣爲  
惡者未始不及于凶其幸而免者亦時有焉而小人之慮遂以爲

天道難知爲善未必福而爲惡未必禍也武后之惡不及于大戮  
所謂幸免者也至中宗韋氏則禍不旋踵矣然其親遭母后之難  
而躬自蹈之所謂下愚之不移者歟

本紀第四 終

魏川屯鳳臺  
氏圖而開市

唐書四

本紀第五

魏川屯鳳臺  
氏圖而開市

唐書五

睿宗玄真大聖大興孝皇帝諱旦高宗第八子也始封殷王領冀州大都督單于大都護長而溫恭好學通詁訓工草隸書徙封豫王又封冀王累遷右金吾衛大將軍洛州牧徙封相王復封豫王武后廢中宗立為皇帝其改國號周以為皇嗣居于東宮中宗自房州還復為皇太子武后封皇嗣為相王授太子右衛率累遷右羽林衛大將軍并州牧安北大都護諸道元帥中宗復位進號安國相王景雲元年六月壬午韋皇后弒中宗矯詔立溫王重茂為皇太子以刑部尚書裴談工部尚書張錫同中書門下三品吏部尚書張嘉福中書侍郎岑羲吏部侍郎崔湜同中書門下平章事發諸府兵五萬屯京師以韋溫總知內外兵馬甲申乃發喪又矯遺詔自立為皇太后皇太子即皇帝位以睿宗參謀政事大赦改

元曰唐隆太后臨朝攝政罷睿宗參謀政事以爲太尉封嗣雍王守禮爲邠王壽春郡王成器宋王丁亥溫王妃陸氏爲皇后壬辰紀處訥張嘉福岑義持節巡撫關內河南北庚子臨淄郡王隆基率萬騎兵入北軍討亂誅韋氏安樂公主及韋巨源馬秦客駙馬都尉武延秀光祿少卿楊均辛丑睿宗奉皇帝御安福門大赦賜文武官階勳爵免天下歲租之半進封隆基爲平王朝邑尉劉幽求爲中書舍人苑總監鍾紹京爲中書侍郎參知機務壬寅紹京及黃門侍郎李日知同中書門下三品紀處訥韋溫宗楚客將作大匠宗晉卿司農卿趙履溫伏誅貶汴王邕爲沁州刺史蕭至忠許州刺史韋嗣立宋州刺史趙彥昭絳州刺史崔湜華州刺史癸卯太白晝見平王隆基同中書門下三品鍾紹京行中書令張嘉福伏誅甲辰安國相王卽皇帝位于承天門大赦長流長任及流

人未達者還之賜內外官階爵復重茂爲溫王乙巳鍾紹京罷丙午太常少卿薛稷爲黃門侍郎參豫機務丁未立平王隆基爲皇太子復則天大聖皇后號曰天后戊申許州刺史姚元之爲兵部尚書同中書門下三品韋嗣立蕭至忠爲中書令趙彥昭爲中書侍郎崔湜爲吏部侍郎同中書門下平章事七月庚戌進封衡陽郡王成義爲申王巴陵郡王隆範岐王彭城郡王隆業薛王癸丑兵部尚書崔日用爲黃門侍郎參豫機務丁巳洛州長史宋璟檢校吏部尚書同中書門下三品岑義罷壬戌貶蕭至忠爲晉州刺史韋嗣立許州刺史趙彥昭宋州刺史張錫絳州刺史崔湜罷丙寅貶李嶠爲懷州刺史姚元之兼中書令蘇瓌爲尚書左僕射丁卯唐休璟張仁亶罷己巳大赦改元賜內外官及子爲父後者勳一轉崔日用薛稷罷乙亥廢崇恩廟昊陵順陵追廢皇后韋氏爲

庶人安樂公主為勃逆庶人八月庚寅譙王重福及汴州刺史鄭  
愔反伏誅癸巳罷墨敕斜封官貶裴談為蒲州刺史九月辛未太  
子少師致仕唐休璟為朔方道行軍大總管以備突厥十月乙未  
追號天后曰大聖天后癸卯出義宗于太廟十一月戊申姚元之  
為中書令己酉葬孝和皇帝于定陵壬子蘇瓌韋安石罷宋王成  
器為尚書左僕射丁卯赦靈駕所過己巳宋王成器為司徒

二年正月己未太僕卿郭元振中書侍郎張說同中書門下平章  
事甲子徙封重茂為襄王乙丑追冊妃劉氏竇氏為皇后二月丁  
丑皇太子監國甲申貶姚元之為申州刺史宋璟楚州刺史丙戌  
太子少保韋安石為侍中劉幽求罷復墨敕斜封官辛卯禁屠三  
月癸丑作金仙玉真觀四月甲申韋安石為中書令宋王成器罷  
辛卯李日知為侍中壬寅大赦賜文武官階勳爵民酺三日甲辰

作玄元皇帝廟五月庚戌復吳陵順陵置官屬壬戌殿中監竇懷  
貞為左御史臺大夫同中書門下平章事八月乙卯大赦賜酺三  
日丁巳皇太子釋奠于國學庚午韋安石為尚書左僕射同中書  
門下三品九月乙亥竇懷貞為侍中十月甲辰吏部尚書劉幽求  
為侍中右散騎常侍魏知古太子詹事崔湜為中書侍郎同中書  
門下三品中書侍郎陸象先同中書門下平章事韋安石李日知  
郭元振竇懷貞張說罷十二月丁未作潑寒胡戲

先天元年正月辛未享于太廟甲戌并汾絳三州地震辛巳有事  
于南郊戊子耕藉田己丑大赦改元曰太極賜內外官階爵民酺  
五日版授九十以上下州刺史八十以上上州司馬辛卯幸安福  
門觀酺三日夜壬辰陸象先同中書門下三品乙未戶部尚書岑  
羲左御史臺大夫竇懷貞同中書門下三品二月丁巳皇太子釋

莫于國學是春旱五月戊寅有事于北郊辛巳大赦改元曰延和  
賜內外官陪禮者勳一轉民酺五日六月癸丑岑羲爲侍中乙卯  
追號大聖天后爲天后聖帝辛酉刑部尚書郭元振爲朔方道行  
軍大總管以伐突厥甲子幽州都督孫佺左武衛將軍李楷洛左  
威衛將軍周以悌及奚戰于冷陁山敗績七月辛未彗星入于  
太微兵部尚書李迥秀爲朔方道後軍大總管乙亥竇懷貞爲尚  
書右僕射平章軍國重事己卯幸安福門觀樂三日而止丙戌以  
早減膳八月庚子立皇太子爲皇帝以聽小事自尊爲太上皇以  
聽大事壬寅追號天后聖帝爲聖后甲辰大赦改元賜內外官及  
五品以上子爲父後者勳爵民酺五日丁未立皇太子妃王氏爲  
皇后戊申封皇帝子嗣直爲剡王嗣謙郢王己酉宋王成器爲司  
徒庚戌竇懷貞爲尚書左僕射劉幽求守尚書右僕射同中書門

下三品魏知古爲侍中崔湜檢校中書令戊午流劉幽求于封州  
九月丁卯朔日有食之甲午封皇帝子嗣昇爲陝王十月辛卯獵  
于驪山十一月丁亥誥遣皇帝巡邊甲午幽州都督宋璟爲左軍  
大總管并州長史薛訥爲中軍大總管兵部尚書郭元振爲右軍  
大總管

二年正月乙亥吏部尚書蕭至忠爲中書令二月追作先天元年  
酺六月辛丑以雨霖避正殿減膳丙辰郭元振同中書門下三品  
七月甲子大赦乙丑誥歸政于皇帝開元四年六月崩于百福殿  
年五十五諡曰大聖真皇帝天寶十三載增諡玄真大聖大興孝  
皇帝

玄宗至道大聖大明孝皇帝諱隆基睿宗第三子也母曰昭成皇  
后竇氏性英武善騎射通音律曆象之學始封楚王後爲臨淄郡

王累遷衛尉少卿潞州別駕景龍四年朝于京師遂留不遣庶人  
韋氏已弒中宗矯詔稱制玄宗乃與太平公主子薛崇簡尚衣奉  
御王崇暉公主府典籤王師虔朝邑尉劉幽求苑總監鍾紹京長  
上折衝麻嗣宗押萬騎果毅葛福順李仙鳧道士馮處澄僧普潤  
定策討亂或請先啓相王玄宗曰請而從是王與危事不從則吾  
計失矣乃夜率幽求等入苑中福順仙鳧以萬騎兵攻玄武門斬  
左羽林將軍韋播中郎將高嵩以徇左萬騎由左入右萬騎由右  
入玄宗率總監羽林兵會兩儀殿梓宮宿衛兵皆起應之遂誅韋  
氏黎明馳謁相王謝不先啓相王泣曰賴汝以免不然吾且及難  
乃拜玄宗殿中監兼知內外閑廐檢校隴右群牧大使押左右萬  
騎進封平王同中書門下三品睿宗卽位立爲皇太子景雲二年  
監國聽除六品以下官延和元年星官言帝坐前星有變睿宗曰

誅

傳德避災吾意決矣七月壬辰制皇太子宜卽皇帝位太子惶懼  
入請睿宗曰此吾所以答天戒也皇太子乃御武德殿除三品以  
下官八月庚子卽皇帝位先天元年十月庚子享于太廟大赦  
開元元年正月辛巳皇后親蠶七月甲子太平公主及岑羲蕭至  
忠竇懷貞謀反伏謀乙丑始聽政丁卯大赦賜文武官階爵庚午  
流崔湜于竇州甲戌毀天樞乙亥尚書右丞張說檢校中書令庚  
辰陸象先罷八月癸巳劉幽求爲尚書右僕射知軍國大事壬寅  
宋王成器爲太尉申王成義爲司徒邠王守禮爲司空九月丙寅  
宋王成器罷庚午劉幽求同中書門下三品張說爲中書令十月  
姚嵩蠻寇姚州都督李蒙死之己亥幸溫湯癸卯講武于驪山流  
郭元振于新州給事中唐紹伏誅免新豐來歲稅賜從官帛甲辰  
獵于渭川同州刺史姚元之爲兵部尚書同中書門下三品乙巳

至自渭川十一月乙丑劉幽求兼侍中戊子群臣上尊號曰開元  
神武皇帝十二月庚寅大赦改元賜內外官勳改中書省為紫微  
省門下省為黃門省侍中為監甲午吐蕃請和己亥禁潑寒胡戲  
壬寅姚崇兼紫微令癸丑劉幽求罷貶張說為相州刺史甲寅黃  
門侍郎盧懷慎同紫微黃門平章事

二年正月壬午以關內旱求直諫停不急之務寬繫囚祠名山大  
川葬暴骸甲申并州節度大使薛訥同紫微黃門三品以伐契丹  
二月壬辰避正殿減膳徹樂突厥寇北庭都護郭虔瓘敗之己酉  
慮囚三月己亥磧西節度使阿史那獻執西突厥都擔四月辛未  
停諸陵供奉鷹犬五月辛亥魏知古罷六月京師大風拔木甲子  
以太上皇避暑徙御大明宮七月乙未焚錦繡珠玉于前殿戊戌  
禁采珠玉及為刻鏤器玩珠繩帖縉服者廢織錦坊庚子薛訥及

奚契丹戰于灤河敗績丁未襄王重茂薨追冊為皇帝八月壬戌  
禁女樂乙亥吐蕃寇邊薛訥攝左羽林軍將軍為隴右防禦大使  
右驍衛將軍郭知運為副以伐之九月庚寅作興慶宮丁酉宴京  
師侍老于含元殿賜九十以上几杖八十以上鳩杖婦人亦如  
之賜于其家戊申幸溫湯十月戊午至自溫湯甲子薛訥及吐蕃  
戰于武階敗之十二月乙丑封子嗣真為鄆王嗣初鄂王嗣玄鄂  
王

三年正月丁亥立郢王嗣謙為皇太子降死罪流以下原之賜酺  
三日癸卯盧懷慎檢校黃門監二月辛酉赦囚非惡逆造偽者四  
月庚申突厥部三姓葛邏祿來附右羽林軍大將軍薛訥為源川  
鎮軍大總管涼州都督楊執一副之右衛大將軍郭虔瓘為朔川  
鎮軍大總管并州長史王駿副之以備突厥五月丁未以早錄京



師囚戊申避正殿減膳七月庚辰朔日有食之十月辛酉雋州蠻寇邊右驍衛將軍李玄道伐之壬戌薛訥爲朔方道行軍大總管太僕卿呂延祚靈州刺史杜賓客副之癸亥如郿赦所過徒罪以下賜侍老九十以上及篤疾者物甲子如鳳泉湯戊辰降大理繫囚罪十一月己卯至自鳳泉湯乙酉幸溫湯丁亥相州人崔子岳反伏誅甲午至自溫湯乙未禁白衣長髮會十二月乙丑降鳳泉湯所過死罪以下

四年正月戊寅朝太上皇于西宮二月丙辰幸溫湯辛酉吐蕃寇松州廓州刺史蓋思貴伐之丁卯至自溫湯癸酉松州都督孫仁獻及吐蕃戰敗之六月甲子太上皇崩辛未京師華陝二州大風拔木癸酉大武軍子將郝靈佺殺突厥默啜七月丁丑吐蕃請和丁酉洛水溢八月辛未奚契丹降十月庚午葬大聖真皇帝于橋

陵正月己卯盧懷慎罷丁亥遷中宗于西廟丙申尚書左丞源乾曜爲黃門侍郎同紫微黃門平章事十二月乙卯定陵寢殿火丙辰幸溫湯乙丑至自溫湯閏月己亥姚崇源乾曜罷刑部尚書宋璟爲吏部尚書兼黃門監紫微侍郎蘇頌同紫微黃門平章事五年正月癸卯太廟四室壞遷神主于太極殿素服避正殿輟視朝五日己酉享于太極殿辛亥如東都戊辰大霧二月甲戌大赦賜從官帛給復河南一年免河南北蝗水州今歲租三月丙寅吐蕃請和四月甲申毀拜洛受圖壇己丑子嗣一卒五月丙辰詔公侯子孫襲封七月壬寅隴右節度使郭知運及吐蕃戰敗之九月壬寅復紫微省爲中書省黃門省爲門下省監爲侍中十月戊寅祔神主于太廟甲申命史官月奏所行事

六年正月辛丑突厥請和二月壬辰朔方道行軍大總管王峻伐

突厥六月甲申瀝水溢八月庚辰以旱慮囚十月癸亥賜河南府懷汝鄭三州父老帛十一月辛卯至自東都丙申享于太廟元皇帝以上三祖枝孫失官者授五品京官皇祖妣家子孫在選者甄擇之免知頓及旁州供承者一歲租稅乙巳改傳國璽曰寶是月突厥執單于副都護張知運

七年五月己丑朔日有食之素服徹樂減膳中書門下慮囚六月戊辰吐蕃請和閏七月辛巳以旱避正殿徹樂減膳甲申慮囚八月丙戌慮囚九月甲戌徙封宋王憲為寧王十月作義宗廟于東都辛卯幸溫湯癸卯至自溫湯十一月乙亥皇太子入學齒胄賜陪位官及學生帛

八年正月辛巳宋璟蘇頲罷京兆尹源乾曜為黃門侍郎并州都督府長史張嘉貞為中書侍郎同中書門下平章事二月戊戌子

陵

敏卒三月甲子免水旱州逋負給復四鎮行人家一年五月丁卯源乾曜為侍中張嘉貞為中書令六月庚寅洛瀝穀水溢九月突厥寇甘源涼州都督楊敬述及突厥戰敗績丙寅降京城囚罪杖以下原之壬申契丹寇邊王皎檢校幽州都督節度河北諸軍大使黃門侍郎韋抗為朔方道行軍大總管以伐之甲戌中書門下慮囚十月辛巳如長春宮壬午獵于下邳庚寅幸溫湯十一月乙卯至自溫湯

九年正月括田丙寅幸溫湯乙亥至自溫湯二月丙戌突厥請和丁亥免天下七年以前逋負四月庚寅蘭池胡康待賓寇邊五月庚午原見囚死流罪隨軍効力徒以下未發者七月己酉王峻執康待賓八月蘭池胡康願子寇邊九月乙巳朔日有食之癸亥天兵軍節度大使張說為兵部尚書同中書門下三品十一月庚午

大赦賜文武官階爵唐隆先天實封功臣坐事免若死者加增賜  
民醕三日十二月乙酉幸溫湯壬辰至自溫湯是冬無雪

十年正月丁巳如東都二月丁丑次望春頓賜從官帛四月巳亥  
張說持節朔方軍節度大使五月戊午突厥請和辛酉伊汝水溢  
閏月壬申張說巡邊六月丁巳河決博棣二州七月庚辰給復遭  
水州丙戌安南人梅叔鸞反伏誅九月張說敗康願子于木盤山  
執之巳卯京兆人權梁山反伏誅癸未吐蕃攻小勃律北庭節度  
使張孝嵩敗之十月甲寅如興泰宮獵于上宜川庚申如東都十  
二月突厥請和

十一年正月丁卯降東都囚罪杖以下原之巳巳如并州降囚罪  
徒以下原之賜侍老物庚辰次潞州赦囚給復五年以故第爲飛  
龍宮辛卯次并州改并州爲北都癸巳赦太原府給復一年下戶

三年元從家五年版授侍老八十以上上縣令婦人縣君九十以  
上上州長史婦人郡君百歲以上上州刺史婦人郡夫人二月巳  
酉貶張嘉貞爲幽州刺史壬子如汾陰祠后土賜文武官階勳爵  
帛癸亥張說兼中書令三月辛未至自汾陰免所過今歲稅赦京  
城四月甲子張說爲中書令吏部尚書王峻爲兵部尚書同中書  
門下三品五月乙丑復中宗于太廟巳丑王峻持節朔方軍節度  
大使辛卯遣使分巡天下六月王峻巡邊八月戊申追號宣皇帝  
曰獻祖光皇帝曰懿祖十月丁酉幸溫湯作溫泉宮甲寅至自溫  
湯十一月戊寅有事于南郊大赦賜奉祠官階勳爵親王公主一  
子官高年粟帛季子順孫終身勿事天下醕三日京城五日十二  
月甲午如鳳泉湯戊申至自鳳泉湯庚申貶王峻爲蘄州刺史  
十二年四月壬寅詔傍繼國王禮當廢而屬近者封郡王七月巳

卯廢皇后王氏爲庶人十月庶人王氏卒十一月庚午如東都庚辰溪州首領覃行章反伏誅辛巳申王攜薨閏十二月丙辰朔日有食之

十三年正月戊子降死罪流以下原之遣使宣慰天下壬子葬朔方隴右河西戰亡者三月甲午徙封郟王潭爲慶王陝王浚忠王鄆王洽棣王鄆王滉榮王封子浚爲光王濉儀王湮穎王澤永王清壽王洄延王沐盛王溢濟王九月丙戌罷奏祥瑞十月辛酉如兗州庚午次濮州賜河南北五百里內父老帛十一月庚寅封于泰山辛卯禪于社首壬辰大赦賜文武官階勳爵致仕官一季祿公主嗣王郡縣主一子官諸蕃酋長來會者一官免所過一歲兗州二歲租賜天下醕七日丙申幸孔子宅遣使以太牢祭其墓給復近墓五戶丁酉賜徐曹亳許仙豫六州父老帛十二月巳巳如

東都

十四年二月邕州獠梁大海反伏誅四月丁巳戶部侍郎李元紘爲中書侍郎同中書門下平章事庚申張說罷丁卯岐王範薨六月戊午東都大風拔木壬戌詔州縣長官言事七月癸未灑水溢八月丙午河決魏州九月巳丑磧西節度使杜暹檢校黃門侍郎同中書門下平章事十月甲寅太白晝見庚申如廣成湯巳巳如東都十二月丁巳獵于方秀川

十五年正月辛丑河西隴右節度使王君奭及吐蕃戰于青海敗之七月甲戌震興教門觀災庚寅洛水溢巳亥降都城囚罪徒以下原之八月澗穀溢毀澗池縣巳巳降天下死罪嶺南邊州流人徒以下原之九月丙子吐蕃寇瓜州執刺史田元獻閏月庚子寇安西副大都護趙頤貞敗之庚申回紇襲甘州王君奭死之十月

貞  
巳卯至自東都十一月丁卯獵于城南十二月乙亥幸溫泉宮丙戌至自溫泉宮

十六年正月壬寅趙頤真及吐蕃戰于曲子城敗之乙卯瀧州首領陳行範反伏誅庚申許徒以下囚係任營農三月辛丑免營農囚罪七月吐蕃寇瓜州刺史張守珪敗之乙巳隴右節度使張志亮河西節度使蕭嵩克吐蕃大莫門城八月辛卯及吐蕃戰于祁連城敗之九月丙午以久雨降囚罪徒以下原之十月巳卯幸溫泉宮巳丑至自溫泉宮十一月癸巳蕭嵩為兵部尚書同中書門下平章事甲辰弛陂澤禁戊申幸寧王憲第庚戌至自寧王憲第十二月丁卯幸溫泉宮丁丑至自溫泉宮

千  
十七年二月丁卯雋州都督張審素克雲南昆明城鹽城三月戊戌張守珪及吐蕃戰于大同軍敗之四月癸亥降死罪流以下原

之乙亥大風震藍田山崩六月甲戌源乾曜杜暹李元紘罷蕭嵩兼中書令戶部侍郎宇文融為黃門侍郎兵部侍郎裴光庭為中書侍郎同中書門下平章事九月壬子貶宇文融為汝州刺史十月戊午朔日有食之十一月庚寅享于太廟丙申拜橋陵赦奉先縣戊戌拜定陵巳亥拜獻陵壬寅拜昭陵乙巳拜乾陵戊申至自乾陵大赦免今歲稅之半賜文武官階爵侍老帛旌表孝子順孫義夫節婦終身勿事唐隆兩營立功三品以上予一子官免供頓縣今歲稅賜諸軍行人勳兩轉十二月辛酉幸溫泉宮壬申至自溫泉宮是冬無雪

十八年正月辛卯裴光庭為侍中二月丙寅大雨雷震左飛龍殿災辛未免囚罪杖以下四月乙卯築京師外郭五月巳酉奚契丹附于突厥六月甲子有彗星出于五車癸酉有星孛于畢昴乙亥

灤水溢丙子忠王浚爲河北道行軍元帥壬午洛水溢九月丁巳忠王浚兼河東道諸軍元帥十月戊子吐蕃請和庚寅如鳳泉湯十一月丁卯幸溫泉宮丁丑至自溫泉宮

十九年正月殺灤州別駕王毛仲丙子耕于興慶宮巳卯禁捕鯉魚四月壬午降死罪以下丙申立太公廟六月乙酉大風拔木七月癸丑吐蕃請和八月辛巳以千秋節降死罪流以下原之十月丙申如東都十一月乙卯次洛城南賜從官帛是歲楊州穠稻生二十年正月乙卯信安郡王禕爲河東河北道行軍副元帥以伐奚契丹二月甲戌朔日有食之壬午降囚罪徒以下原之三月巳巳信安郡王禕及奚契丹戰于薊州敗之五月戊申忠王浚俘奚契丹以獻六月丁丑浚爲司徒八月辛未朔日有食之九月乙巳渤海靺鞨寇登州刺史韋俊死之左領軍衛將軍蓋福慎伐之戊

辰以宋滑兗鄆四州水免今歲稅十月壬午如潞州丙戌中書門下慮巡幸所過囚辛卯赦潞州給復三年賜高年粟帛十一月辛丑如北都癸丑赦北都給復三年庚申如汾陰祠后土大赦免供頓州今歲稅賜文武官階勳爵諸州侍老帛武德以來功臣三品以上一子官民鬴三日十二月辛未至自汾陰

二十一年正月丁巳幸溫泉宮二月丁亥至自溫泉宮三月乙巳裴光庭薨甲寅尚書右丞韓休爲黃門侍郎同中書門下平章事閏月癸酉幽州副總管郭英傑及契丹戰于都山英傑死之四月乙卯遣宣慰使黜陟官吏決繫囚丁巳寧王憲爲太尉薛王業爲司徒五月戊子以皇太子納妃降死罪流以下原之七月乙丑朔日有食之九月壬午封子沔爲信王泚義王濯陳王澄豐王漣恒王漩涼王滔深王十月庚戌幸溫泉宮巳未至自溫泉宮十二月

丁巳蕭嵩韓休罷京兆尹裴耀卿爲黃門侍郎中書侍郎張九齡同中書門下平章事

二十二年正月己巳如東都二月壬寅秦州地震給復壓死者家一年三人者三年四月甲辰降死罪以下甲寅北庭都護劉渙謀反伏誅五月戊子裴耀卿爲侍中張九齡爲中書令黃門侍郎李林甫爲禮部尚書同中書門下三品是月大風拔木六月壬辰幽州節度使張守珪俘奚契丹以獻七月己巳薛王業薨十一月甲戌免關內河南八等以下戶田不百畝者今歲租十二月戊子朔日有食之乙巳張守珪及契丹戰敗之殺其王屈烈

二十三年正月乙亥耕藉田大赦侍老百歲以上版授上州刺史九十以上中州刺史八十以上上州司馬賜陪位官勳爵征防兵父母年七十者遣還民酺三日八月戊子免鰥寡惻獨今歲稅米

十月戊申突騎施寇邊閏十一月壬午朔日有食之是冬東都人劉普會反伏誅

二十四年正月丙午北庭都護蓋嘉運及突騎施戰敗之四月丁丑降死罪以下五月丙午醴泉人劉志誠反伏誅八月甲寅突騎施請和乙亥汴王璿薨十月戊申京師地震甲子次華州免供頓州今歲稅賜刺史縣令中上考降兩京死罪流以下原之丁卯至自東都十一月辛丑東都地震壬寅裴耀卿張九齡罷李林甫兼中書令朔方軍節度副大使牛仙客爲工部尚書同中書門下三品十二月戊申慶王琮爲司徒

二十五年三月乙酉張守珪及契丹戰于捺祿山敗之辛卯河西節度副大使崔希逸及吐蕃戰于青海敗之四月辛酉殺監察御史周子諒乙丑廢皇太子瑛及鄂王瑤光王琚爲庶人皆殺之十

一月壬申幸溫泉宮乙酉至自溫泉宮十二月丙午惠妃武氏薨  
丁巳追冊爲皇后

二十六年正月甲戌潮州刺史陳思挺謀反伏誅乙亥牛仙客爲  
侍中丁丑迎氣于東郊降死罪流以下原之以京兆稻田給貧民  
禁王公獻珍物賜文武官帛壬辰李林甫兼隴右節度副大使二  
月乙卯牛仙客兼河東節度副大使三月丙子有星孛于紫微癸  
巳京師地震吐蕃寇河西崔希逸敗之鄯州都督杜希望克其新  
城四月巳亥有司讀時令降死罪流以下原之五月乙酉李林甫  
兼河西節度副大使六月庚子立忠王璿爲皇太子七月巳巳大  
赦賜文武九品以上及五品以上子爲父後者勳一轉侍老粟帛  
加版授免京畿下戶今歲租之半賜民酺三日九月丙申朔日有  
食之庚子益州長史王昱及吐蕃戰于安戎城敗績十月戊寅幸

溫泉宮壬辰至自溫泉宮

二十七年正月壬寅榮上琬巡按隴右二月巳巳群臣上尊號曰  
開元聖文神武皇帝大赦免今歲稅賜文武官階爵版授侍老百  
歲以上下州刺史婦人郡君九十以上上州司馬婦人縣君八十  
以上縣令婦人鄉君賜民酺五日八月乙亥磧西節度使蓋嘉運  
敗突騎施于賀邏嶺執其可汗吐火仙壬午吐蕃寇邊河西隴右  
節度使蕭昊敗之十月丙戌幸溫泉宮十一月辛丑至自溫泉宮  
二十八年正月癸巳幸溫泉宮庚子至自溫泉宮三月丁亥朔日  
有食之壬子益州司馬章仇兼瓊敗吐蕃克安戎城五月癸卯吐  
蕃寇安戎城兼瓊又敗之十月甲子幸溫泉宮以壽王妃楊氏爲  
道士號太真戊辰以徐泗二州無蠶免今歲稅辛巳至自溫泉宮  
十一月牛仙客罷朔方河東節度副大使



二十九年正月癸巳幸溫泉宮丁酉立玄元皇帝廟禁厚葬庚子  
至自溫泉宮五月庚戌求明道德經及莊列文子者降死罪流以  
下原之七月乙亥伊洛溢九月丁卯大雨雪十月丙申幸溫泉宮  
戊戌遣使黜陟官吏十一月庚戌邠王守禮薨辛酉至自溫泉宮  
己巳雨木冰辛未寧王憲薨追冊爲皇帝及其妃元氏爲皇后十  
二月癸未吐蕃陷石堡城

天寶元年正月辛未大赦改元詔京文武官材堪刺史者自舉賜  
侍老八十以上粟帛九品以上勳兩轉甲寅陳王府參軍田同秀  
言玄元皇帝降于丹鳳門通衢二月丁亥群臣上尊號曰開元天  
寶聖文神武皇帝辛卯享玄元皇帝于新廟甲午享于太廟丙申  
合祭天地于南郊大赦侍老加版授賜文武官階爵改侍中爲左  
相中書令爲右相東都爲東京北都爲北京州爲郡刺史爲太守

七月癸卯朔日有食之辛未牛仙客薨八月丁丑刑部尚書李適  
之爲左相十月丁酉幸溫泉宮十一月己巳至自溫泉宮十二月  
戊戌隴右節度使皇甫惟明及吐蕃戰于青海敗之庚子河西節  
度使王倕克吐蕃漁海遊奕軍朔方軍節度使王忠嗣及奚戰于  
紫乾河敗之遂伐突厥是冬無冰

二年正月乙卯作昇仙宮丙辰加號玄元皇帝曰大聖祖三月壬  
子享于玄元宮追號大聖祖父周上御大夫敬曰先天太皇咎繇  
曰德明皇帝涼武昭王曰興聖皇帝改西京玄元宮曰太清宮東  
宮曰太微宮四月己卯皇甫惟明克吐蕃洪濟城六月甲戌震東  
京應天門觀災十月戊寅幸溫泉宮十一月乙卯至自溫泉宮十  
二月壬午海賊吳令光寇永嘉郡是冬無雪

三載正月丙申改年爲載降死罪流以下原之辛丑幸溫泉宮辛

亥有星隕于東南二月庚午至自溫泉宮丁丑河南尹裴敦復晉陵郡太守劉同昇南海郡太守劉巨鱗討吳令光閏月令光伏誅三月壬申降死罪流以下原之八月丙午拔悉蜜攻突厥殺烏蘇米施可汗來獻其首十月甲午幸溫泉宮十一月丁卯至自溫泉宮十二月癸丑祠九宮貴神于東郊大赦詔天下家藏孝經賜文武官階爵侍老粟帛民酺三日

四載正月丙戌王忠嗣及突厥戰于薩河內山敗之三月壬申以外孫獨孤氏女爲靜樂公主嫁于契丹松漠都督李懷節楊氏女爲宜芳公主嫁于奚饒樂都督李延寵八月壬寅立太真爲貴妃九月契丹奚皆殺其公主以叛甲申皇甫惟明及吐蕃戰于石堡城副將褚誚死之十月戊戌幸溫泉宮十二月戊戌至自溫泉宮五載正月乙亥停六品以下員外官三月丙子遣使黜陟官吏四

月庚寅李適之罷丁酉門下侍郎陳希烈同中書門下平章事五月壬子朔日有食之七月殺括蒼郡太守韋堅播川郡太守皇甫惟明十月戊戌幸溫泉宮十一月己巳至自溫泉宮十二月甲戌殺贊善大夫杜有鄰著作郎王曾左驍衛兵曹參軍柳勣左司禦率府倉曹參軍王修己右武衛司戈盧寧左威衛參軍徐徵六載正月辛巳殺北海郡太守李邕淄川郡太守裴敦復丁亥享于太廟戊子有事于南郊大赦流人老者許致仕停立仗鉞賜文武官階爵侍老粟帛民酺三日三月甲辰陳希烈爲左相七月乙酉以旱降死罪流以下原之十月戊申幸華清宮十一月丁酉殺戶部侍郎楊慎矜及其弟少府少監慎餘洛陽令慎名十二月癸丑至自華清宮是歲安西副都護高仙芝及小勃律國戰敗之七載五月壬午群臣上尊號曰開元天寶聖文神武應道皇帝大

赦免來載租庸以魏周隋爲三恪賜京城父老物人十段七十以上版授本縣令婦人縣君六十以上縣丞天下侍老百歲以上上郡太守婦人郡君九十以上上郡司馬婦人縣君八十以上縣令婦人鄉君賜文武官勳兩轉民醮三日十月庚戌幸華清宮十二月辛酉至自華清宮

八載四月殺咸寧郡太守趙奉璋六月乙卯隴右節度使哥舒翰及吐蕃戰于石堡城敗之閏月丙寅謁太清宮加上玄元皇帝號曰聖祖大道玄元皇帝增祖宗帝后諡群臣上尊號曰開元天地大寶聖文神武應道皇帝大赦男子七十婦人七十五以上皆給一子侍賜文武官階爵民爲戶者古爵醮三日十月乙丑幸華清宮是月特進何履光率十道兵以伐雲南十一月丁巳幸御史中丞楊釗莊

九載正月己亥至自華清宮丁巳詔以十一月封華嶽三月辛亥華嶽廟災關內旱乃停封五月庚寅慮囚九月辛卯以商周漢爲三恪十月庚申幸華清宮太白山人王玄翼言玄元皇帝降于寶仙洞十二月乙亥至自華清宮是歲雲南蠻陷雲南郡都督張虔陀死之

十載正月壬辰朝獻于太清宮癸巳朝享于太廟甲午有事于南郊大赦賜侍老粟帛醮三日丁酉李林甫兼朔方軍節度副大使安北副大都護己亥改傳國寶爲承天大寶戊申安西四鎮節度使高仙芝執突騎施可汗及石國王四月壬午劔南節度使鮮于仲通及雲南蠻戰于西洱河大敗績大將王天運死之陷雲南都護府七月高仙芝及大食戰于怛邏斯城敗績八月范陽節度副大使安祿山及契丹戰于吐護真河敗績乙卯廣陵海溢丙辰武

庫災十月壬子幸華清宮十一月乙未幸楊國忠第

十一載正月丁亥至自華清宮二月庚午突厥部落阿布思寇邊三月乙巳改尚書省八部名四月乙酉戶部郎中王鐸京兆人邢綽謀反伏誅丙戌殺御史大夫王鉷李林甫罷安北副大都護五月戊申慶王綜薨甲子東京大風拔木六月壬午御史大夫兼劔南節度使楊國忠敗吐蕃于雲南克故洪城十月戊寅幸華清宮十一月乙卯李林甫罷庚申楊國忠為右相十二月丁亥至自華清宮

十二載五月巳酉復魏周隋為三恪六月阿布思部落降八月中書門下慮囚九月甲寅葛邏祿葉護執阿布思十月戊寅幸華清宮

十三載正月丙午至自華清宮二月壬申朝獻于太清宮加上玄

元皇帝號曰大聖祖高上大道金闕玄元天皇大帝癸酉朝享于太廟增祖宗諡甲戌群臣上尊號曰開元天地大寶聖文神武證道孝德皇帝大赦左降官遭父母喪者聽歸賜孝義旌表者勳兩轉侍老百歲以上版授本郡太守婦人郡夫人九十以上郡長史婦人郡君八十以上縣令婦人縣君太守加賜爵一級縣令勳兩轉民醮三日丁丑楊國忠為司空是日雨土三月隴右河西節度使哥舒翰敗吐蕃復河源九曲辛酉大風拔木五月壬戌觀鬴于勤政樓北庭都護程千里俘阿布思以獻六月乙丑朔日有食之劔南節度留後李宓及雲南蠻戰于西洱河死之八月丙戌陳希烈罷文部侍郎韋見素為武部尚書同中書門下平章事是秋漣洛水溢十月乙酉幸華清宮十二月戊午至自華清宮十四載三月壬午安祿山及契丹戰于潢水敗之八月天有聲于

浙西八月辛卯降死罪流以下原之免今載租庸半賜侍老米十月庚寅幸華清宮十一月安祿山反陷河北諸郡范陽將何千年殺河東節度使楊光翹壬申伊西節度使封常清爲范陽平盧節度使以討安祿山丙子至自華清宮九原郡太守郭子儀爲朔方軍節度副大使右羽林軍大將軍王承業爲太原尹衛尉卿張介然爲河南節度採訪使右金吾大將軍程千里爲上黨郡長史以討安祿山丁丑榮王琬爲東討元帥高仙芝副之十二月丁亥安祿山陷靈昌郡辛卯陷陳留郡執太守郭納張介然死之癸巳安祿山陷滎陽郡太守崔無詖死之丙申封常清及安祿山戰于鬲子谷敗績丁酉陷東京留守李愷御史中丞盧奕判官蔣清死之河南尹達奚珣叛降于安祿山巳亥恒山郡太守顏杲卿何千年執之克趙鉅鹿廣平清河河間景城樂安博平博陵上谷文安

敗

信都魏鄴十四郡癸卯封常清高仙芝伏誅哥舒翰持節統領處置太子先鋒兵馬副元帥守潼關甲辰郭子儀及安祿山將高秀巖戰于河曲敗之戊申榮王琬薨壬子濟南郡太守李隨單父尉賈賁濮陽人尚衡以兵討安祿山是月平原郡太守顏真卿饒陽郡太守盧全誠司馬李正以兵討安祿山

十五載正月乙卯東平郡太守嗣吳王祗以兵討安祿山丙辰李隨爲河南節度使以討安祿山壬戌祿山陷恒山郡執顏杲卿表履謙陷鄴廣平鉅鹿趙上谷博陵文安魏信都九郡癸亥朔方軍節度副使李光弼爲河東節度副大使以討祿山甲子南陽郡太守魯炅爲南陽節度使率嶺南黔中山南東道兵屯于葉縣乙丑安慶緒寇潼關哥舒翰敗之丁丑真源令張巡以兵討安祿山二月巳亥嗣吳王祗及祿山將謝元同戰于陳留敗之李光弼克恒

山郡郭子儀出井陘會光弼及安祿山將史思明戰敗之庚子賈  
賁戰于雍丘死之三月顏真卿克魏郡史思明寇饒陽平原乙卯  
張巡及安祿山將令狐潮戰于雍丘敗之丙辰殺戶部尚書安思  
順太僕卿安元貞乙丑李光弼克趙郡四月乙酉北海郡太守賀  
蘭進明以兵救平原丙午太子左贊善大夫來瑱為潁川郡太守  
兼招討使五月丁巳魯炅及安祿山戰于泚水敗績奔于南陽戊  
辰嗣虢王巨為河南節度使六月癸未顏真卿及安祿山將袁知  
泰戰于堂邑敗之賀蘭進明克信都丙戌哥舒翰及安祿山戰于  
靈寶西原敗績是日郭子儀李光弼及史思明戰于嘉山敗之辛  
卯蕃將火拔歸仁執哥舒翰叛降于安祿山遂陷潼關上洛郡甲  
午詔親征京兆尹崔光遠為西京留守招討處置使丙申行在望  
賢宮丁酉次馬嵬左龍武大將軍陳玄禮殺楊國忠及御史大夫

魏方進太常卿楊暄賜貴妃楊氏死是日張巡及安祿山將翟伯  
玉戰于白沙塢敗之己亥祿山陷京師辛丑次陳倉闕廢使任沙  
門叛降于祿山丙午次河池郡劔南節度使崔圓為中書侍郎同  
中書門下平章事七月甲子次普安郡憲部侍郎房琯為文部尚  
書同中書門下平章事丁卯皇太子為天下兵馬元帥都統朔方  
河東河北平盧節度使御史中丞裴冕隴西郡司馬劉秩副之江  
陵大都督永王璘為山南東路黔中江南西路節度使盛王琦為  
廣陵郡都督江南東路淮南道節度使豐王珙為武威郡都督河  
西隴右安西北庭節度使庚午次巴西郡以太守崔渙為門下侍  
郎同中書門下平章事韋見素為左相庚辰次蜀郡八月壬午大  
赦賜文武官爵為安祿山脅從能自歸者原之癸巳皇太子即  
皇帝位于靈武以聞庚子上皇帝誥遣韋見素房琯崔渙奉皇帝

冊于靈武十一月甲寅憲部尚書李麟同中書門下平章事十二月甲辰永王璘反廢爲庶人至德二載正月庚戌誥求天下孝悌可旌者甲子劔南健兒賈秀反伏誅三月庚午通化郡言玄元皇帝降五月庚申誥追冊貴嬪楊氏爲皇后七月庚戌行營健兒李季反伏誅庚午劔南健兒郭千仞反伏誅十月丁巳皇帝復京師以聞誥降劔南囚罪流以下原之十二月丁未至自蜀郡居于興慶宮三載上號曰太上至道聖皇天帝上元元年徙居于西內甘露殿元年建巳月崩于神龍殿年七十八

贊曰睿宗因其子之功而在位不久固無可稱者嗚呼女子之禍于人甚矣自高祖至于中宗數十年間再罹女禍唐祚旣絕而復續中宗不免其身韋氏遂以滅族玄宗親平其亂可以鑒矣而又敗以女子方其勵精政事開元之際幾致太平何其盛也及侈心

一動窮天下之欲不足爲其樂而溺其所甚愛忘其所可戒至于竄身失國而不悔考其始終之異性習之相遠也至于如此可不慎哉可不慎哉

本紀第五

終

唐書卷五

唐書五

本紀第六

唐書卷六

唐書六

肅宗文明武德大聖大宣孝皇帝諱亨玄宗第三子也母曰元獻  
 皇后楊氏初名嗣昇封陝王開元四年為安西大都護性純孝好  
 學玄宗尤愛之遺賀知章潘肅呂向皇甫彬邢璣等侍讀左右十  
 五年更名浚徙封忠王為朔方節度大使單于大都護十八年奚  
 契丹寇邊乃以肅宗為河北道行軍元帥遣御史大夫李朝隱等  
 八總管兵十萬以伐之居二歲朝隱等敗奚契丹于范陽北肅宗  
 以統帥功遷司徒二十三年又更名璵二十五年皇太子瑛廢死  
 明年立為皇太子有司行冊禮其儀有中嚴外辨其服絳紗太子  
 曰此天子禮也乃下公卿議太師蕭嵩左丞相裴耀卿請改外辨  
 為外備絳紗衣為朱明服乃從之二十八年又更名紹天寶三載  
 又更名亨安祿山來朝太子識其有反相請以罪誅之玄宗不聽



祿山反十五載。玄宗避賊行至馬嵬。父老遮道請留太子討賊。玄宗許之。遣壽王瑁及內侍高力士諭太子。太子乃還。六月丁酉。至渭北。便橋橋絕。募水濱居民得三千餘人。涉而濟。遇潼關散卒。以爲賊。與戰多傷。旣而覺之。收其餘。以涉後軍多沒者。夕次永壽縣。吏民稍持牛酒來獻。新平郡太守薛羽。保定郡太守徐穀聞賊且至。皆棄城走。己亥。太子次保定。捕得羽。穀斬之。辛丑。次平涼。郡得牧馬牛羊。兵始振。朔方留後支度副使杜鴻漸。六城水陸運使魏少游。節度判官崔漪。支度判官崔簡。金關內鹽池判官李涵。河西行軍司馬裴冕。迎太子治兵于朔方。庚戌。次豐寧。見大河之險。將保之。會天大風。迴趨靈武。七月辛酉。至于靈武。壬戌。裴冕等請皇太子卽皇帝位。甲子。卽皇帝位。于靈武。尊皇帝曰上皇天帝。大赦。改元至德。賜文武官階勳爵。版授侍老。太守縣令裴冕爲中書侍

郎。同中書門下平章事。甲戌。安祿山寇扶風。太守薛景仙敗之。八月辛卯。張巡及安祿山將李廷望戰于雍丘。敗之。十月辛巳朔。日有食之。癸未。次彭原。郡詔御史諫官論事。勿先白大夫及宰相。始鬻爵度僧尼。房瑄爲招討西京防禦。蒲潼兩關兵馬元帥。兵部尚書王思禮副之。南軍入于宜壽。中軍入于武功。北軍入于奉天。辛卯。河南節度副使張巡及令狐潮戰于雍丘。敗之。辛丑。房瑄以中軍北軍及安祿山之衆戰于陳濤斜。敗績。癸卯。瑄又以南軍戰敗。績是月。遣永王璘朝上皇天帝于蜀郡。璘反。丹徒郡太守閻敬之及璘戰于伊婁。埭死之。十一月辛亥。河西地震。戊午。崔渙爲江南宣慰使。郭子儀率回紇及安祿山戰于河上。敗之。史思明寇太原。十二月。安祿山陷魯東平濟陰三郡。戊子。給復彭原郡二載。安祿山陷潁川。執太守薛愿及長史龐堅。是歲吐蕃陷雋州嶺南溪獠。

梁崇牽陷容州

二載正月永王璘陷鄱陽郡乙卯安慶緒弑其父祿山丙寅河西兵馬使孟庭倫殺其節度使周泌以武威郡反乙亥安慶緒將尹子奇寇睢陽郡張巡敗之二月戊子次于鳳翔李光弼及安慶緒之衆戰于太原敗之丁酉關西節度兵馬使郭英乂及安慶緒戰于武功敗績慶緒陷馮翊郡太守蕭賁死之慶緒將蔡希德寇太原戊戌庶人璘伏誅庚子郭子儀及安慶緒戰于潼關敗之壬寅河西判官崔偁克武威郡孟庭倫伏誅甲辰郭子儀及安慶緒戰于永豐倉敗之大將李韶光王祚死之三月辛酉韋見素裴冕罷憲部尚書致仕苗晉卿爲左相四月戊寅郭子儀爲關內河東副元帥壬午瘞陣亡者庚寅郭子儀及安慶緒將李歸仁戰于劉運橋敗之五月癸丑子儀及慶緒將安守忠戰于清渠敗績丁巳房

瑄罷諫議大夫張鎬爲中書侍郎同中書門下平章事六月癸未尹子奇寇睢陽丁酉南兗郡民何滔執其太守楊齊曾以反劔南節度使盧元裕敗之七月己酉太白經天丁巳安慶緒將安武臣陷陝郡八月丁丑焚長春宮甲申崔渙罷張鎬兼河南節度使都統淮南諸軍事靈昌郡太守許叔冀奔于彭城癸巳大閱閏月甲寅安慶緒寇好時渭北節度使李光進敗之丁卯廣平郡王俶爲天下兵馬元帥郭子儀副之以朔方安西回紇南蠻大食兵討安慶緒辛未京畿採訪宣慰使崔光遠及慶緒戰于駱谷敗之行軍司馬王伯倫戰于苑北死之九月丁丑慶緒陷上黨郡執節度使程千里壬寅廣平郡王俶及慶緒戰于澧水敗之癸卯復京師慶緒奔于陝郡尚書左僕射裴冕告太清宮郊廟社稷五陵宣慰百姓十月戊申廣平郡王俶及安慶緒戰于新店敗之克陝郡壬子

復東京慶緒奔于河北興平軍兵馬使李奐及慶緒之衆戰于武關敗之克上洛郡吐蕃陷西平郡癸丑安慶緒陷睢陽太守許遠及張巡鄆州刺史姚閻左金吾衛將軍南霽雲皆死之癸亥給復鳳翔五載版授父老官遣太子太師韋見素迎上皇天帝于蜀郡丁卯至自靈武嚮于太廟哭三日己巳關內節度使王思禮及安慶緒戰于絳郡敗之十一月丙子張鎬率四鎮伊西北庭行營兵馬使李嗣業陝西節度使來瑱河南都知兵馬使嗣吳王祗克河南郡縣庚子作九廟神王告享于長樂殿十二月丙午上皇天帝至自蜀郡甲寅苗晉卿爲中書侍郎同中書門下平章事戊午大赦靈武元從蜀郡扈從官三品以上予一子官四品以下一子出身瘞陣亡者致祭之給復其家二載免天下租庸來歲三之一禁珠玉寶鈿平脫金泥刺繡復諸州及官名以蜀郡爲南京鳳翔郡

爲西京西京爲中京給復潞州五載并鄧許滑宋五州雍丘好時奉先縣二載益州三載賜文武官階勳爵父老八十以上版授加緋衣銀魚民醵五日廣平郡王俶爲太尉進封楚王苗晉卿爲侍中崔圓爲中書令李麟同中書門下三品進封子南陽郡王係爲趙王新城郡王僅彭王潁川郡王憫兗王東陽郡王佺涇王封子儻爲襄王倕杞王偲召王侶興王侗定王乙丑史思明降壬申達奚珣等伏誅

乾元元年正月戊寅上皇天帝御宣政殿授皇帝傳國受命寶符冊號曰光天文武大聖孝感皇帝乙酉出宮女三千人庚寅大閱二月癸卯安慶緒將能元皓以淄青降以元皓爲河北招討使乙巳上上皇天帝冊號曰聖皇天帝丁未大赦改元贈死事及拒僞命者官成都靈州扈從三品以上予一子官五品以上一子出身

六品以下敘進之免陷賊州三歲稅賜文武官階爵三月甲戌徙封俶爲成王戊寅立俶妃張氏爲皇后四月辛亥祔神主于太廟甲寅朝享于太廟有事于南郊乙卯大赦賜文武官階勳爵天下非租庸毋輒役使有能賑貧窮寵以官爵京官九品以上言事二王三恪予一子官史思明殺范陽節度副使烏承恩以反五月戊子張鎬罷乙未崔圓李麟罷太常少卿王璵爲中書侍郎同中書門下平章事七月党項羌寇邊九月丙子招討党項使王仲昇殺拓拔戎德庚寅郭子儀率李光弼李嗣業王思禮淮西節度使魯炁興平軍節度使李奐滑濮節度使許叔冀平盧兵馬使董秦鄭蔡節度使季廣琛以討安慶緒癸巳大食波斯寇廣州十月甲辰立成王俶爲皇太子大赦賜文武官階爵五品以上子爲父後者勳兩轉舉忠正孝友堪東宮官者十一月壬申王思禮及安慶緒

戰于相州敗之十二月庚戌戶部尚書李峘都統淮南江西江東節度使丁卯史思明陷魏州

二年正月己巳群臣上尊號曰乾元大聖光天文武孝感皇帝郭子儀及安慶緒戰于愁思岡敗之丁丑祠九宮貴神戊寅耕藉田二月壬戌中書門下慮囚三月己巳皇后親蠶壬申九節度之師潰于滏水史思明殺安慶緒東京留守崔圓河南尹蘇震汝州刺史賈至奔于襄鄧郭子儀屯于東京丁亥以旱降死罪流以下原之流民還者給復三年甲午兵部侍郎呂諲同中書門下平章事乙未苗晉卿王璵罷京兆尹李峴爲吏部尚書中書舍人李揆爲中書侍郎戶部侍郎第五琦同中書門下平章事丙申郭子儀爲東畿山南東河南等道諸節度防禦兵馬元帥四月庚子王思禮及史思明戰于直千嶺敗之壬寅詔減常膳服御武德中尚作坊

非賜蕃客戎祀所須者皆罷之五月辛巳貶李峴爲蜀州刺史七月辛巳趙王係爲天下兵馬元帥李光弼副之辛卯呂諲罷八月乙巳襄州防禦將康楚元張嘉延反逐其刺史王政九月甲子張嘉延陷荊州丁亥太子少保崔光遠爲荆襄招討山南東道處置兵馬使庚寅史思明陷東京及齊汝鄭滑四州十月乙巳李光弼及史思明戰于河陽敗之壬戌呂諲起復十一月庚午貶第五琦爲忠州刺史十二月乙巳康楚元伏誅史思明寇陝州神策軍將衛伯玉敗之

上元元年三月丙子降死罪流以下原之四月戊申山南東道將張維瑾反殺其節度使史翽丁巳有彗星出于婁胃己未來瑱爲山南東道節度使以討張維瑾閏月辛酉有彗星出于西方甲戌徙封係爲越王己卯大赦改元賜文武官爵追封太公望爲武成

王復死刑三覆奏是月大饑張維瑾降五月丙午太子太傅苗晉卿爲侍中壬子呂諲罷六月乙丑鳳翔節度使崔光遠及羌渾黨項戰于涇隴敗之乙酉又敗之于普潤李光弼及史思明戰于懷州敗之七月丁未聖皇天帝遷于西內十一月甲午楊州長史劉展反陷潤州丙申陷昇州壬子李峴淮南節度使鄧景山及劉展戰于淮上敗績是歲吐蕃陷廓州西原蠻寇邊桂州經略使邢濟敗之

二年正月甲寅降死罪流以下原之乙卯劉展伏誅二月己未奴刺党項羌寇寶雞焚大散關寇鳳州刺史蕭愔死之鳳翔尹李鼎敗之戊寅李光弼及史思明戰于北邙敗績思明陷河陽癸未貶李揆爲袁州長史河中節度使蕭華爲中書侍郎同中書門下平章事乙酉來瑱及史思明戰于魯山敗之三月甲午史朝義寇陝

州神策軍節度使衛伯玉敗之戊戌史朝義弒其父思明李光弼  
罷副元帥四月己未吏部侍郎裴遵慶爲黃門侍郎同中書門下  
平章事乙亥青密節度使尚衡及史朝義戰敗之丁丑兗鄆節度  
使能元皓又敗之壬午劍南東川節度使李光弼使段子璋反陷綿州  
遂州刺史嗣虢王巨死之節度使李奐奔于成都五月甲午史朝  
義將令狐彰以滑州降戊戌平盧軍節度使侯希逸及史朝義戰  
于幽州敗之庚子李光弼爲河南道副元帥劍南節度使崔光遠  
克東川段子璋伏誅七月癸未朔日有食之八月辛巳殿中監李  
國貞都統朔方鎮西北庭興平陳鄭河中節度使九月壬寅大赦  
去乾元大聖光天文武孝感號去上元號稱元年以十一月爲歲  
首月以斗所建辰爲名賜文武官階勳爵版授侍老官先授者敘  
進之停四京號元年建子月癸巳曹州刺史常休朋及史朝義將

薛粦戰敗之己亥朝聖皇天帝于西內丙午衛伯玉及史朝義戰  
于永寧敗之己酉朝獻于太清宮庚戌朝享于太廟及元獻皇后  
廟建丑月辛亥有事于南郊己未來瑱及史朝義戰于汝州敗之  
乙亥侯希逸及朝義將李懷仙戰于范陽敗之

寶應元年建寅月甲申追冊靖德太子琮爲皇帝妃竇氏爲皇后  
乙酉葬王公妃主遇害者丙戌盜發敬陵惠陵甲辰李光弼克許  
州吐蕃請和戊申史朝義陷營州建卯月辛亥大赦賜文武官階  
爵五品以上清望及郎官御史薦流人有行業情可矜者停貢鷹  
鷂狗豹以京兆府爲上都河南府爲東都鳳翔府爲西都江陵府  
爲南都太原府爲北都壬子羌渾奴刺寇梁州癸丑河東軍亂殺  
其節度使鄧景山都知兵馬使辛雲京自稱節度使乙丑河中軍  
亂殺李國貞及其節度使荔非元禮戊辰淮西節度使王仲昇及

史朝義將謝欽讓戰于申州敗績庚午郭子儀知朔方河中北庭  
潞儀澤沁節度行營興平定國軍兵馬副元帥壬申鄜州刺史成  
公意及党項戰敗之建辰月壬午大赦官吏聽納贓免罪左降官  
及流人罰鎮効力者還之甲午奴刺寇梁州戊申蕭華罷戶部侍  
郎元載同中書門下平章事建巳月庚戌史朝義寇澤州刺史李  
抱玉敗之壬子楚州獻定國寶玉十有三甲寅聖皇天帝崩乙丑  
皇太子監國大赦改元年爲寶應元年復以正月爲歲首建巳月  
爲四月丙寅閑廐使李輔國飛龍廐副使程元振遷皇后于別殿  
殺越王係充王憊是夜皇帝崩于長生殿年五十二  
代宗睿文孝武皇帝諱豫肅宗長子也母曰章敬皇后吳氏玄宗  
諸孫百餘人代宗最長爲嫡皇孫聰明寬厚喜愠不形于色而好  
學強記通易象初名俶封廣平郡王安祿山反玄宗幸蜀肅宗留

討賊代宗常從於兵間肅宗已卽位郭子儀等兵討安慶緒未克  
肅宗在岐至德二載九月以廣平郡王爲天下兵馬元帥率朔方  
安西回紇南蠻大食等兵二十萬以進討百官送于朝堂過闕而  
下步出木馬門然後復騎以安西北庭行營節度使李嗣業爲前  
軍朔方河西隴右節度使郭子儀爲中軍關內行營節度使王思  
禮爲後軍屯于香積寺敗賊將安守忠斬首六萬級賊將張通儒  
守長安聞守忠敗棄城走遂克京城乃留思禮屯于苑中代宗率  
大軍以東安慶緒遣其將嚴莊拒于陝州代宗及子儀嗣業戰陝  
西大敗之慶緒奔于河北遂克東都肅宗還京師十二月進封楚  
王

乾元元年三月徙封成王四月立爲皇太子初太子生之歲豫州  
獻嘉禾于是以爲祥乃更名豫肅宗去上元三年號止稱元年月

以斗所建辰爲名元年建巳月肅宗寢疾乃詔皇太子監國而楚州獻定國寶十有三因曰楚者太子之所封今天降寶于楚宜以建元乃以元年爲寶應元年肅宗張皇后惡李輔國欲圖之召問太子太子不許乃與越王係謀之肅宗疾革四月丁卯皇后與係將召太子入宮飛龍副使程元振得其謀以告輔國輔國止太子無入率兵入殺係及兗王僦幽皇后于別殿是夕肅宗崩乃迎太子見群臣于九仙門明日發喪巳巳卽皇帝位于柩前癸酉始聽政甲戌奉節郡王适爲天下兵馬元帥郭子儀罷副元帥乙亥進封适爲魯王五月壬午李輔國爲司空庚寅追尊母爲皇太后丙申李光弼及史朝義戰于宋州敗之丁酉大赦刺史予一子官賜文武官階爵子爲父後者勳一轉免民逋租宿負進封子益昌郡王邈爲鄭王延慶郡王迴韓王追復庶人王氏爲皇后瑛瑤瑑皆

復其封號六月辛亥追廢皇后張氏越王係兗王僦皆爲庶人七月乙酉殺山南東道節度使裴茂癸巳劔南西川兵馬使徐知道反八月巳未知道伏誅辛未台州人袁鼂反乙亥徙封适爲雍王九月戊子鳳州刺史呂日將及党項羌戰于三嗟谷敗之丙申回紇請助戰壬寅大閱癸卯袁鼂陷信州十月乙卯陷溫明二州詔浙江水旱百姓重困州縣勿輒科率民疫死不能葬者爲瘞之辛酉雍王适討史朝義壬戌盜殺李輔國癸酉雍王适克懷州甲戌敗史朝義于橫水克河陽東都史朝義將張獻誠以汴州降十一月丁亥朝義將薛嵩以相衛洛邢四州降丁酉朝義將張忠志以北副元帥十二月巳酉太府左藏庫火戊辰瘞京城內外暴骨甲戌李光弼及袁鼂戰于衢州敗之是歲舒州人楊昭反殺其刺史



劉秋子西原蠻叛吐蕃寇秦成渭三州

廣德元年正月癸未京兆尹劉晏爲吏部尚書同中書門下平章事甲申史朝義自殺其將李懷仙以幽州降田承嗣以魏州降壬寅山陵使山南東道節度使來瑱有罪伏誅三月甲辰山南東道兵馬使梁崇義自南陽入于襄州丁未李光弼及袁鼂戰敗之辛酉葬至道大聖大明孝皇帝于泰陵甲子党項羌寇同州郭子儀敗之于黃堆山庚午葬文明武德大聖大宣孝皇帝于建陵六月同華節度使李懷讓自殺七月壬寅群臣上尊號曰寶應元聖文武孝皇帝壬子大赦改元免民逋負戶三丁免其一庸調給復河北三年回紇行營所經免今歲租賜內外官階勳爵給功臣鐵券藏名于太廟圖形于凌煙閣吐蕃陷隴右諸州八月僕固懷恩反九月壬寅裴遵慶宣慰僕固懷恩于汾州乙丑涇州刺史高暉叛

附于吐蕃十月庚午吐蕃陷邠州辛未寇奉天武功京師戒嚴壬申雍王适爲關內兵馬元帥郭子儀副之癸酉渭北行營兵馬使呂日將及吐蕃戰于盤屋敗之乙亥又戰于盤屋敗績丙子如陝州丁丑次華陰豐王珙有罪伏誅戊寅吐蕃陷京師立廣武郡王承宏爲皇帝辛巳次陝州癸巳吐蕃潰郭子儀復京師南山五谷人高玉反十一月壬寅廣州市舶使呂太一反逐其節度使張休十二月辛未劉晏宣慰上都甲午至自陝州乙未苗晉卿裴遵慶罷檢校禮部尚書李峴爲黃門侍郎同中書門下平章事丙申放承宏于華州吐蕃陷松維二州西原蠻陷道州

二年正月丙午詔舉堪御史諫官刺史縣令者乙卯立雍王适爲皇太子癸亥劉晏李峴罷右散騎常侍王縉爲黃門侍郎太常卿杜鴻漸爲兵部侍郎同中書門下平章事郭子儀兼河東副元帥

二月辛未僕固懷恩殺朔方軍節度留後渾釋之癸酉朝獻于太  
清宮甲戌朝享于太廟乙亥有事于南郊己丑大赦賜內外官階  
爵武德功臣子孫予一人官成都靈武元從三品以上加賜爵一  
級餘加一階寶應功臣三品以上官一子仍賜爵一級餘加階勳  
兩轉五品以上爲父後者勳兩轉三月辛丑給復河南府二年甲  
子盛王琦薨四月甲午禁鈿作珠翠五月洛水溢六月丁卯有星  
隕于汾州七月庚子初稅青苗己酉李光弼罷八月丙寅王縉爲  
侍中都統河南淮南山南東道節度行營事壬申王縉罷侍中癸  
巳吐蕃寇邠州邠寧節度使白孝德敗之于宜祿九月己未劍南  
節度使嚴武及吐蕃戰于當狗城敗之是秋有蝻十月丙寅吐蕃  
寇邠州丁卯寇奉天京師戒嚴庚午嚴武克吐蕃鹽川城辛未朔  
方兵馬使郭晞及吐蕃戰于邠西敗之是月突厥寇豐州守將馬

望死之十一月乙未吐蕃軍潰京師解嚴河西節度使楊志烈及  
僕固懷恩戰于靈州敗績癸丑袁鼂伏誅免越州今歲田租之半  
給復溫台明三州一年十二月乙丑高玉伏誅丙寅衆星隕是歲  
西原蠻陷邵州

永泰元年正月癸巳大赦改元是月歙州人殺其刺史龐濬二月  
戊寅党項羌寇富平庚辰儀王璿薨三月庚子雨水冰庚戌吐蕃  
請和辛亥大風拔木四月己巳自春不雨至于是而雨是夏蓋屋  
穰麥生七月辛卯平盧淄青兵馬使李懷玉逐其節度使侯希逸  
八月庚辰王縉爲河南副元帥僕固懷恩及吐蕃回紇党項羌渾  
奴刺寇邊九月庚寅命百官觀浮屠象于光順門辛卯太白經天  
甲辰吐蕃寇醴泉奉天党項羌寇同州渾奴刺寇蓋屋京師戒嚴  
己酉屯于苑郭子儀屯于涇陽丁巳同華節度使周智光及吐蕃

戰于澄城敗之智光入于鄜州殺其刺史張麟遂焚坊州十月沙陀殺楊志烈己未吐蕃至邠州與回紇寇邊辛酉寇奉天癸亥寇同州乙丑寇興平丁卯回紇党項羌請降癸酉郭子儀及吐蕃戰于靈臺敗之京師解嚴閏月辛卯朔方副將李懷光克靈州辛亥劔南西山兵馬使崔旰反寇成都節度使郭英乂奔于靈池普州刺史韓澄殺之癸丑斂民貲作浮屠供

大曆元年二月吐蕃遣使來朝壬子杜鴻漸爲山南西道劔南東西川邛南西山等道副元帥三月癸未劔南東川節度使張獻誠及崔旰戰于梓州敗績七月癸酉洛水溢九月辛巳吐蕃陷原州十一月甲子大赦改元給復流民歸業者三年十二月己亥有彗星出于瓠瓜癸卯周智光反殺虢州刺史龐充是冬無雪鄭王邈爲天下兵馬元帥

二年正月丁巳郭子儀討周智元己未周華將李漢惠以同州降甲子周智光伏誅淮西節度使李忠臣入于華州戊寅給復同華二州二年八月壬寅殺駙馬都尉姜慶初九月甲寅吐蕃寇靈州乙卯寇邠州郭子儀屯于涇陽京師戒嚴乙丑晝有星流于南方是秋桂州山獠反十月戊寅朔方軍節度使路嗣恭及吐蕃戰于靈州敗之京師戒嚴十一月辛未雨水冰壬申京師地震

三年二月癸巳商州兵馬使劉洽殺其刺史殷仲卿三月乙巳朔日有食之五月乙卯追號齊王倓爲皇帝興信公主女張氏爲皇后癸亥地震六月壬寅幽州兵馬使朱希彩殺其節度使李懷仙自稱留後閏月庚午王縉兼幽州盧龍軍節度使七月壬申瀘州刺史楊子琳反陷成都劔南節度留後崔寬敗之克成都子琳殺夔州別駕張忠戊寅吐蕃遣使來朝八月己酉吐蕃寇靈州丁卯

寇邠州京師戒嚴戊辰邠寧節度使馬璘及吐蕃戰敗之庚午王  
縉兼河東節度使九月丁丑濟王環薨壬午吐蕃寇靈州朔方將  
白元光敗之壬辰又敗之于靈武戊戌京師戒嚴十二月辛酉涇  
原兵馬使王童之謀反伏誅

四年正月甲戌殺潁州刺史李崱二月乙卯杜鴻漸罷副元帥丙  
辰京師地震三月遣御史稅商錢甲戌免京兆今歲租五月丙戌  
京師地震六月戊申王縉罷副元帥都統七月癸未降死罪流以  
下原之十月丁巳大霧十一月辛未禁畿內弋獵壬申杜鴻漸罷  
癸酉元載權知門下省事甲戌吐蕃寇靈州朔方軍節度留後常  
謙光敗之丙子左僕射裴冕同中書門下平章事癸巳裴冕兼河  
南淮西山南東道副元帥十二月戊戌裴冕薨是歲廣州人馮崇  
道桂州人朱濟時反容管經略使王翊敗之

五年正月辛卯鳳翔節度使李抱玉為河西隴右山南西道副元  
帥三月癸酉內侍監魚朝恩有罪自殺丙戌以昭陵皇堂有光赦  
京兆關輔四月庚子湖南兵馬使臧玠殺其團練使崔灌己未有  
彗星出于五車五月己卯有彗星出于北方六月己未以彗星滅  
降死罪流以下原之錄魏徵王珪李靖李勣房玄齡杜如晦之後  
是歲湖南將王國良反及西原蠻寇州縣

六年二月壬寅李抱玉罷山南西道副元帥三月王翊敗梁崇牽  
克容州四月戊寅藍田西原地陷禁大綱竭鑿六破錦及文紗吳  
綾為龍鳳麒麟天馬辟邪者五月戊申殺殿中侍御史陸珽成都  
府司錄參軍事李少良大理評事韋頌

七年二月庚午江州江溢五月乙酉大雨雹大風拔木乙未以旱  
大赦減膳徹樂是秋幽州盧龍將李懷瑗殺其節度使朱希彩經

略軍副使朱泚自稱留後十月乙亥以淮南旱免租庸三之一  
十一月庚辰免巴蓬溧集壁充通開八州二歲租庸十二月丙寅雨  
土有長星出于參

八年正月甲辰詔京官三品以上及郎官御史歲舉刺史縣令一  
人五月辛卯鄭王邈薨壬辰赦京師癸卯降死罪流以下原之八  
月己未吐蕃寇靈州郭子儀敗之于七級溧甲子廢華州屯田給  
貧民九月壬午循州刺史哥舒晃反殺嶺南節度使呂崇賁戊子  
詔京官五品以上兩省供奉官郎官御史言事十月庚申吐蕃寇  
涇邠丙寅朔方兵馬使渾瑊及吐蕃戰于宜祿敗績涇原節度使  
馬璘及吐蕃戰于潘原敗之

九年二月辛未徐州兵亂逐其刺史梁乘四月壬辰大赦十月壬  
申信王瑑薨乙亥涼王璿薨壬辰降京師死罪流以下原之

十年正月丁酉昭義軍兵馬使裴志清逐其節度使薛粦叛附于  
田承嗣壬寅壽王瑁薨戊申田承嗣反癸丑承嗣陷洛州乙卯劔  
南西川節度使崔寧及吐蕃戰于西山敗之二月乙丑田承嗣陷  
衛州刺史薛雄死之辛未封子述爲睦王逾邠王連恩王遘鄜王  
造忻王暹韶王運嘉王遇端王通恭王遠原王逸雅王丙  
子河陽軍亂逐三城使常休明三月甲午陝州軍亂逐其觀察使  
李國清四月癸未河東節度使薛兼訓等討田承嗣給復昭義五  
州二年甲申大雨雹大風拔木五月乙未魏博將霍榮國以磁州  
降甲寅大雨雹大風拔木震闕門六月甲戌成德軍節度使李寶  
臣及田承嗣戰于冀州敗之七月己未杭州海溢八月己丑田承  
嗣寇磁州九月壬寅降京師死罪流以下原之壬子吐蕃寇臨涇  
癸丑寇隴州丙辰李抱玉敗之于義寧丁巳馬璘又敗之于百里

城十月辛酉朔日有食之甲子昭義軍節度使李承昭及田承嗣戰于清水敗之丙寅貴妃獨孤氏薨丁卯追冊爲皇后十一月丁酉魏博將吳希光以瀛州降丁未嶺南節度使路嗣恭克廣州哥舒晃伏誅

十一年正月庚寅田承嗣降辛亥崔寧及吐蕃戰敗之五月汴宋都虞候李靈耀反殺濮州刺史孟鑿七月庚寅田承嗣寇滑州永平軍節度使李勉敗績八月甲申淮西節度使李忠臣河陽三城馬燧及李勉討李靈耀閏月丁酉太白晝見九月乙丑李忠臣馬燧及李靈耀戰于鄭州敗績十月乙酉戰于中牟敗之壬辰忠臣又敗之于西梁固壬寅淮南節度使陳少遊及李靈耀戰于汴州敗之丙子田承嗣以兵援靈耀李忠臣敗之于匡城甲寅靈耀伏誅

十二年三月庚午赦田承嗣辛巳元載有罪伏誅貶王縉爲括州刺史四月壬午太常卿楊綰爲中書侍郎禮部侍郎常袞爲門下侍郎同中書門下平章事癸巳詔諫官獻封事勿限時側門論事者隨狀面奏六品以上官言事投匭者無勒副章丁酉吐蕃寇黎雅二州崔寧敗之是月金州人卓英璘反六月乙巳英璘伏誅給復金州二年丁未以旱降京師死罪流以下原之七月己巳楊綰薨丙子詔尚書御史大夫左右丞侍郎舉任刺史者九月庚午吐蕃寇坊州是秋河溢十一月壬子山南西道節度使張獻恭及吐蕃戰于岷州敗之十二月丁亥崔寧及吐蕃戰于西山敗之是歲恒定趙三州地震冬無雪

十三年正月戊辰回紇寇并州癸酉河東節度留後鮑防及回紇戰于陽曲敗績二月庚辰代州刺史張光晟及回紇戰于羊虎谷

敗之四月甲辰吐蕃寇靈州常謙光敗之十月巳丑禁京畿持兵器捕獵是歲郴州黃岑山崩

十四年二月癸未魏博節度使田承嗣卒其兄子悅自稱留後三月丁未汴宋將李希烈逐其節度使李忠臣自稱留後五月辛酉不豫詔皇太子監國是夕皇帝崩于紫宸內殿年五十三

贊曰天寶之亂大盜遽起天子出奔方是時肅宗以皇太子治兵討賊真得其職矣然以僖宗之時唐之威德在人紀綱未壞孰與天寶之際而僖宗在蜀諸鎮之兵糾合戮力遂破黃巢而復京師由是言之肅宗雖不即尊位亦可以破賊矣蓋自高祖以來三遜于位以授其子而獨睿宗上畏天戒發于誠心若高祖玄宗豈其志哉代宗之時餘孽猶在平亂守成蓋亦中材之主也

本紀第六

終

薛川生鳳閣  
氏雷而甫

唐書六

